


特 別
A18
4892
10





18
4892
10



明詩綜卷二十三

小長蘆

朱彝尊

錄

長水

杜庭珠

緝評



吳與弼

三首

與弼字子傳臨川人天順初以薦徵至京拜左

春坊左諭德辭不就有康齋集

婁克貞云先生詩本乎性情原於義理發自得

之

靜志居詩話龜山之出由蔡氏未足為龜山也聘君薦自石亨與聘君何損焉獨是鶴書一至亟令弟子表迎恩之橋綵雲之山建皇華天使集慶之亭焚芟裂荷惟恐不速而又跋石亨族譜自稱門下士則龜山義不屑出此也詩亦俗劣非惟不及白沙方之定山亦不逮

牧轉岡

仄磴陟崔嵬沉吟不知去塵襟一蕭散逸興迷雲樹梅

< 2002-94 >

殘誰氏花麥漲朝來雨樵牧東西來雜坐迭相語預期
明日晴重作看山侶

黃嵐坑

連山桃李開晴光爛如許寧知明日花不有今宵雨

宿湖頭

野闊雲爭暝江空雨未休問程須策馬燈火宿湖頭

蕭子鵬一首

子鵬字宜冲新淦人以薦授嘉興府學教授有

雲丘子集

梅文淵云郡博蕭先生從康齋吳聘君游歸結菴玉管
山麓與新喻胡希仁永豐羅應魁南昌張廷祥新會陳
云甫諸君子皆友善弘治改元詔徵遺逸那守汝寧戴瑤薦於朝三原
王公恕禮遇甚厚除郡學教授其詩文體製不一而本諸性命道德之
懿溫厚和平而豪邁跌宕寓焉 戴孟常云先生得康齋先生正傳而
上下議論則有一峰東白白沙諸公故其詩文不徒以琢切雕鏤為工

楊國祥云先生詩文皆自胸中流出其立意造辭
一 根於理辭達氣和雖動輒百言少有離於道者

詩話雲丘先生聘君高弟交於白沙東白一峰東海諸公亦與鏡川雲
東相酬和詩專學擊壤體其秉鐸吾鄉也有自警并示士子詩云天下
無棄物世間無棄人糞穢可滋禾木朽堪為薪牛斃製弓革蠶老吐絲
食靡有因士焉失其學安得成厥身朱門產餓殍白屋回陽春萬事毀
於逸百藝精於勤人不自棄可以辭汙淪所宜揭諸座右又歲晚寫
懷云披殘霜鬢方驚老開到梅花又是春則不失為擊壤集中佳句也
先生司教時百廢具舉集有思樂堂記在明倫堂後則太守黃懋所建
也有尊經閣并夫子燕居記則太守佟時貴所修也有西麗橋記則知
秀水縣韓旭請於御史吳而告成者也餘若楊文壁之迎碧軒梁德輿
之鶴泉梅文淵之冰雪堂戴孟常之環翠軒余敬之之松楸皆有
記存集中顧柳珍趙瀛劉應鈞等修府志繁不采錄因附識於此

欲遊羅浮不果

羅浮青壓海門東雲淨江樓入望通四百峰頭千樹雪
夢魂飛渡月明中

俞誥一首

日言然卷二十三
誥字汝欽嘉興人以父吏部侍郎山任官給事
中出知南康府

盼項文祥不至舟抵於陵夜泊

相去不百里相思愁萬重於陵城下泊夢斷五更鐘

李蕃一首

蕃字文盛桐鄉人天順八年貢士官平樂府照

磨

周青士云質先世居千金圩在受山之麓清江貝先生避地之所
先生子翔翔翻皆有才名村民慕之多讀書自好天順中有李照
磨蕃善詩鄉里至今傳桐花開到邑侯門之句餘若沈韶州榮希仁范
貢士庸彥常陳吏目紀彥綱仲貢士剛叔堅董教諭序大倫皆圩產也
當日諸君豈乏著作
惜乎泯然無聞矣

桐溪

萬年禹鑿東連海百折清流曲抱村風浪不驚魚鳥靜

桐花開到邑侯門

張繇一首

繇字天常海鹽人天順中以貢授晉州判官

晉州述懷

散官何事久殊方回首田園業漸荒多病一年三乞老
思歸十夢九還鄉椿陰已散遼陽月雁影空分海國霜
幾度休衙獨凝睇夕陽西下路茫茫

沈樾一首

樾字元茂平湖人天順間布衣有樗軒橐

懷方孔明

梅風吹雨日綿綿綠漲陂塘已拍天為念故人生計薄

一篙春水種湖田

羅頎 二首

頎字儀甫紹興山陰人

從軍行 二首

悠悠陟山阿當暑草木焦溪獸苦炎熱獨行向我號南
望建嶺巔鬼鬼一何高赤日熾如焚岡阜自不毛持謝
邦族間遠役無乃勞

獨行越荒溪尸積溪流丹四郊何蕭條慘戚秋日寒回
顧望脩塗淒風集高巒拔劍起哀歌流涕傷朱顏悲哉
城南詩古今同所歎

錢洪 一首

洪字理平嘗熟人有竹深遺橐

送徐守民歸浙之常山

壯游湖海幾經年老氣凌雲雪滿顛詩思已成芳草夢
歸心又上木蘭船長亭人折春前柳驛路梅開雪後天
萬壑千巖舊形勝酒尊茶竈向誰邊

陳鑾 一首

鑾字廷和湖州人

題桃花鷓鴣

瑤池三月正春酣淺綠深紅雨露含莫唱鷓鴣新樂府
座中有客是江南

錙師邵 三首

師邵字師邵紹興山陰人績之子有半齋集

五馬圖

渥洼水中產龍馬房星之精自天下星奔電掣勢莫當
豈比尋常駕轅者竹批峻耳鐵作蹄雄姿颯沓精權奇
日行三萬等歷塊未許八駿相追隨今觀此圖凡五匹
画史經營各臻極就中一匹是真龍異質殊形人莫識
滄溟氣含雲霧涼蹴齧顧盼思騰驤神奇變化在頃刻
素壁高堂安可常

趙魏公画馬

浚儀王孫善画馬神妙不在江都下朝退從容白玉堂
意匠經營自揮灑我觀此圖誠偉哉清光夾鏡雙瞳開
古來騏驎不易得此匹乃是真龍媒尾如流星汗成血
萬里飛騰宜電掣長風颯颯生四蹄百丈層冰蹴應裂
雄姿眼底苦不多時無伯樂奈爾何駑駘伏櫪飽芻豆
坐使神物成蹉跎君不見才高往往困泥滓世上英雄
亦如此

萍

乍因輕浪疊晴沙又見回風擁釣槎莫怪狂蹤易漂泊
前身不合是楊花

陳寬 二首

寬字孟賢吳人檢討繼之子

錢受之云孟賢與弟孟英自相師友兄弟皆工詩孟

賢尤自矜重日鍛月鍊不輕下一語有侍姬辨慧知書號曰梅花居士孟賢苦吟忽忽多所遺忘姬輒能記之

題燕穆之楚江秋曉圖

五更人語覺潮生
估客帆檣候曉行
樹色未分雲夢澤
雞聲已動漢陽城
天空画角吹霜盡
月落銀河入斗橫
欲問楚南千古事
至今江水爲誰清

題先祖画

綠水園中舊葦門
清風喬木至今存
千金遺墨人間得
腸斷題詩到子孫

陳完一首

完字孟英寬弟有簡齋集

錢塘懷古

邊塵卷地北風遙
泥馬南來駐六橋
汴水故宫猶有月

海門沙漱寂無潮
銅駝夜泣霜華冷
銀雁秋飛王氣銷
五國城頭魂不返
傷心誰賦楚辭招

朱應祥一首

應祥字岐鳳松江華亭人

絕句

江面微風瀉浪開
鳥聲啼過釣魚臺
煖雲欲送桃花雨
一片陰從柳外來

祝祺一首

祺或作淇字汝淵海寧人以子萃貴封刑部主事

旅中元日

異鄉一夜換風烟
屈指關山路八千
正是欲歸歸未得

看人兒女拜新年

趙廷玉 一首

廷玉字芝巖崇德人以入粟補官有芝巖集

金臺留別

笑拂緇塵出帝畿一尊重與故人違青雲紫禁辭仙仗
白鳥滄洲戀釣磯夜雨尚存三徑菊春風仍采故山薇
舊游天上如相憶萬里關河有雁飛

賀麟 一首

麟字文徵嘉興人

楊白花

楊白花隨風飛青春漸老胡不歸化為浮萍將安依美

人聯臂歌未歇宮樹烏啼冷秋月

張德政 一首

德政字平子杭州人流寓南皮內子監十有餘
生草

送客

旅食正蕭條况別知音者空抱流水琴獨立斜陽下

姚翼 二首

翼字廷輔嘉興人有桂巖集

春日與懷用和游鴛鴦湖

鴛鴦湖上春波平鴛鴦飛入菰蒲鳴秀州女兒肌骨輕
蘭舟蕩漾微風生何人打鴨鴛鴦驚春尖遠外花冥冥

夕陽落盡初月明誰家小閣聞調箏

送人之京

送客京華去江干落日斜百年雙短鬢千里一浮槎柳
色河橋雨鶯聲驛路花明朝相憶處雲樹渺天涯

陸琦一首

琦字公璐嘉善人有友蘭集

梅花

雪壓寒香凍未消江城歲晚轉蕭條冷雲漠漠知何處
夢到西湖第六橋

周漳一首

漳莆田人號小溪官河橋主簿有夢草集

寄弟瑩

年來無處避征塵况復衰遲值暮春千里綠蕪江上路
一簾疎雨夜深人白雲鄉國回頭遠青草池塘入夢頻
兩載分攜歸未得強將封鮓慰慈親

蘇大一首

大字景元休寧人嘗輯洪武以來詩為皇明正

音

詩話景元學于趙子常故富春李玉昂贈詩云東山樞者師
先生能繼續其所輯明詩正音度有可觀惜訪之不得也

江樓晚眺懷朱孝常

殊鄉歎行役登覽更淒其落日家千里故人天一涯渚
烟漁父艇江樹水神祠遠道交游少憑誰慰所思

朱 彰 一首

彰字有常嘉興人

暮秋偶成

老去逢秋鬢已霜石田茅屋半荒涼商歌一曲人誰聽

疎雨南山豆葉黃

陳 昌 二首

昌字穎昌平湖人

沈客子云我郡自清江吳隱後風雅衰落四陳三李

之餘無聞焉至正統天順間而始盛一時如陳菊莊外嘉興有姚穀菴海鹽有張芳洲嘉善有周桐村皆卓然成家菊莊吾里先詰才思藻麗長於七言惜其集不傳

題江湖勝覽圖

馬卿子清而癯狂非狂迂非迂不愛養浮丘伯之黃鶴

不愛釣任公子之巨魚年來只愛江湖居江湖風月足
清興筆牀茶竈尋常俱船頭紅拂唱巴曲船尾黃帽歌
吳歛歌吳歛唱巴曲妙舞清商間絲竹白日歡游殊未
足復擬黃昏秉銀燭風帆催送寒山鐘直向垂虹橋下
宿

送吳素行之廣西

廣州南望海冥冥百丈牽江幾日程鯨浪打船風正惡
蜃灰塗屋雨初晴蠻巫祭鬼憑雞卜島戶編氓事象耕
此去化成皆樂土尉佗不敢更言兵

錢 文 一首

文字章靖無錫人諸生試不遇遂隱居不出有

鶴叟詩集

新宅

安穩茅茨屋數間
起來開眼見南山
千帆白日牆頭過
一鳥青天樹杪還

顧潤一首

潤字廷尚崑山人

送王景方歸杭州

闔閭城外送歸航
流水何如客思長
已遣停杯傾別酒
還教攜手上河梁
白蘋漁浦迷秋色
紅樹官亭帶夕陽
最是不堪凝望處
青山無數隔錢塘

盧儒二首

儒字為已崑山人中書舍人

遺安堂為周文伯題二首

鼯鼠飲河流
鷺鳩槍枋榆
適意已云可
多營徒為虛
黃鵠起高翔
遨遊升天衢
忽逢弋人繳
墜翼難再舒
退者止足全
進者忘其軀
衛生不求盈
稍足遂愜意
服厭成都錦
飯舍山陽糶
春熟收繭絲
秋成斂禾穗
田翁笑相語
秫酒聊同會
秉耒因時暇
翰墨欣游藝
多遺一簞金
徒為子孫累

鍾政一首

政字里無攷

揚州

樹繞人家水繞城何郎去後若為情不知東閣梅花處
一作盡二十四橋空月明

陳景融 一首

景融字菊逸嘉興人

答姚景升

露冷催砧杵風高急鼓鞞登樓回首處目斷塞鴻西

史傑 二首

傑字孟哲湖州人大河衛百戶有韞線集

竹石圖

雨餘苔石淨無泥翠影參差夕照低記得推篷湘水曲
滿林秋色鷓鴣啼

蕪城別唐宗吉

揚子橋頭漲滌波分攜無那故人何明朝相憶重回首
莫厭汀雲嶺樹多

魯道 一首

道淮安人

送孟繼之歸梁州

尊酒荆門客南征古道平雲連神女廟山繞夜郎城越
舊開荒服滇池隱旆旌相思日千里腸斷夜猿聲

姚綸 一首

綸字允言嘉興人

修竹仕女

明詩紀卷之三
瑤臺無信託青鸞一寸芳心思萬端莫向東風倚修竹
能禁翠袖幾多寒

劉 玘一首

玘字公禎海鹽人有西林集

秋望

天迴黃雲斷林空古木疎遙憐漢庭使千里寄邊書

滕 鸞一首

鸞字朝儀海鹽人有翠厓集

秋日寫懷

秋色靜柴扉山光鎖翠微紫牽江荇帶紅落渚蓮衣卧
病無人問思家有夢歸相看沙上鳥去住兩忘機

丘 吉 七首

吉字大祐歸安人有順信齋集

錢受之云大祐詩纖麗
主温李為吳興詩人領

袖

詩話瞿宗吉以香奩八題見賞於楊廉夫自是以後從而效之拾西崑
之唾餘雜以鼓詞院曲之穢字誦之欲嘔吳人劉欽謨倡無題詩初不
見好而一時和者紛紛衆推吳興丘大祐為最故沈啓南贈詩有西漢
人材東閣外六朝詩句北牕中之句大祐無題五首中云只解詩中嘲
阿輦寧知花底活秦宮絳桃成子花無色銀燭燒心淚有痕在彼法中
差勝而全首未工他詩若楊柳一堤沽酒路木蘭雙楫載書船吳松東
去皆連海天目西來總是山斜日半村金翡翠青雲千尺玉浮圖白鴉
谷口霜摧栗黃鶴樓前水到門簾外雨多龍洞滿屋頭松老鶴巢稀山
家雲濕長垂箔水館風多不置牕醉筆題詩蕉葉遍夕陽催酒玉鐙空
青山無雪梅花後細雨生寒涼子前賀監酒船湖左右杜陵茆屋瀼西
東消磨盆盞茅紫酒姑負烟霞柳栗條野寺夕陽銀杏葉水村涼雨石
楠花松葉微風三竺路荷花細雨六橋船又題岳鄂王墓云南國有人
論歲幣中原無日見官軍頗有思致大祐自號執柔道人賦才最敏同
郡詩家如唐庠惟周唐廣惟勤張淵子靜沈祥彥庠皆奉之為師友此
虞山蒙叟有吳興領袖之目也

折楊柳

牽馬綰青絲上馬折楊柳願作馬尾蠅遠近隨郎走

擬古

青青澗畔松絲絲谷中蘿悠悠遠道人珊珊雙玉珂道
遠有返轍川逝無迴波游魚懷清淵逸鳥思高柯昔慕
蕭與羸今作羲與和白駒不可駐朱顏尤易磨皎皎合
歡扇文采鴛鴦羅隨君願終老其奈秋風何

楊梅

楊梅獨出吳興異龍井名高味不同饒客幾嘗山雨濕
佳人一笑玉盤空羞看月下櫻桃色不數釵頭荔子紅
更擬明年同采摘要將華髮待熏風

初度日

去歲山城酒一尊今年無恙醉柴門不知有限生辰酒
合得田家幾瓦盆

画山水

二首

翠滴松梢雨乍收山光半為白雲留江邊可惜無人住
間却蘋花一岸秋
樹樹秋風響澗阿夕陽收處暮霞多何人艇子苕谿上
唱得吳儂子夜歌

春夜

香燼銅爐火不增一牀寒被卧春冰不知明月將人夢
去落江樓第幾層

懷悅一首

悅字用和嘉興人以納粟仕

詩話用和輜士林詩黃徵君俞邵言有十卷予購之五十年始得之止上下二卷而已詩家大率吳越之產所常唱和者其居在相湖之南曰柳莊亦曰柳溪故自號柳溪小隱又號相湖漁隱姚允言詩云風流絕勝輞川莊又云雨衣自織青蒲葉烟艇長維綠柳根蘇秉衡詩云簾卷夕陽吟對酒牕臨流水坐看鷗皆題其草堂作也別有東莊曰釣魚所曰觀蓮亭曰清風榻曰白雪窩曰載春舫曰耕雲堂曰栽桑圃曰采菱灘丘大祐賦八景詩贈焉又有北花園姚廷輔有懷氏北花園宴集詩復有水亭名雪艇大祐詩醉倚闌干俯春水是也有齋名鐵松岑公琬詩移得徂徠一蓋青是也有軒名月波陳漢昭詩湖上華軒瞰碧瀾是也其自題鐵松齋詩云青衣開尊傾翠濤詩成落紙飛霜毫園亭詩酒之會極一時之盛而允言有送用和納粟之京作又有冠帶從容新帝澤之句則知當日以納粟入官蓋富而好事者濮樂間之流也今則相湖在望葭茨微茫舊迹不可復問矣

開徑

開徑深林裏莓苔綠到門山多雲壓樹溪曲水通村補

屋交藤蔓疏渠破石根抱琴何處客過我共芳尊

魏時敏一首

時敏莆田人官無錫縣丞改桃源有竹溪詩臺

寄周雀洲太守

風雨越江邊郵亭對夜眠鄉心孤島遠客夢一燈懸訪

舊懷他日論時記昔年離魂將別夢幾度到臨川

王仲輝一首

仲輝字里未詳

詩話仲輝詩題王孟端墨竹真蹟後自稱曰東軒有紫電清霜習武之餘二私記

題王舍人墨竹

我本山野人夙抱烟霞疾何處慣經行松篁與泉石晴

牕偶看琅玕圖淋漓醉墨傾金壺崇岡怪石相高下冷
雨疎烟半有無數竿晴渭川日暖春風輕數竿老懈谷
千年霜雪飽數竿欹楚江歲晚寒風吹數竿側淇澳秋
深雨蕭瑟千竿萬竿難盡名林巒彷彿清風生交枝直
幹平安態勁節虛心君子情對此怡然樂清賞撫卷無
言發遐想烟雨濛濛語鷓鴣詩懷長在湘江上

朱翰二首

翰字漢翔嘉興人有石田清嘯集

湯漸之云漢翔以
教書為業以養其

母事母孝交朋友信性情得其正故發而為詩多溫厚和平渾然天成
而無雕琢藻繪之跡 徐孟時云漢翔詩句法音響感似乎唐 胡廷
俊云朱君隱居鄉校一志於詩嚴潔雅
澹無凡近追琢氣味是亦善鳴者也
詩話漢翔詩太圓熟不脫兔園冊子然留心風雅輯郡
人詩為樵李英華鄉黨典型藉以不墜其功不可泯也

題画

南游匡廬山不知幾萬丈盤回直至香爐峰五老高高
儼相向初疑三山屹立東海中又疑青天削出金芙蓉
世人蹤跡不到處物色匪與人間同天梯石磴無窮極
一片寒凝古苔色千歲桃花別樣紅四時瑤草非常碧
就中有逕深復深白雲洞口猿哀吟一聲長嘯白日晚
神仙渺漠無由尋須臾下來心目爽便欲移家擬重上
東風回首塵茫茫明月滿天勞夢想

送楊少府貶柳州

洞庭秋色對衡山一路猿聲夕照間湘浦舟行何日到
羅池人去幾年還烟村土屋連孤壘嶺樹松牌界百蠻

自古中朝通使節莫因流落歎衰顏

周瑾一首

瑾字汝成秀水人朱翰弟子

南湖即事

湖水空明靜不波蕩舟人遠夕陽多秋來無限相思意
欲采芙蓉奈晚何

朱存理二首

存理字性父長洲人有野航漁歌鶴岑集

楊君謙云性父

居吳封門之外左圖右書一吟一咏或應親友之求或寫胸臆之見率皆簡淡高古有味有法不落穠麗枯澀之境其詩未嘗自匿恒亦流布人間而不知之者蓋鮮何元朗云野航封門老儒在菰花王氏教書與主人晚酌罷主人入內適月上野航得句云萬事不如杯在手一年幾見月當頭喜劇發狂大叫扣扉呼主人起詠此二句主人亦大擊節取酒更酌明日更請吳中善詩者賞之大為張具徵戲樂留連者數日吳

中舊事其風流致足樂也錢受之云性父自少至老未嘗一日志學間人有異書必從訪求以必得為志手自繕錄前輩詩文積百餘家他所纂集若鐵網珊瑚野航漫錄經子鈎玄吳郡獻徵錄名物寓言鶴岑隨筆又數百卷既老不厭坐貧無以自資其書旋亦散去每撫之歎息卒于正德間年七十矣所著野航詩集楊君謙序之今不傳又有朱凱堯民與性父齊名鄉里稱之曰兩朱先生有句曲紀游詩一卷亦不傳自兩人死吳中故實往往無所於考而求其遺書亦難得矣惜哉

詩話性父晚年募刻已詩疏曰嘔心少日已無錦囊之才流淚終年空有碧雲之歎髮白因其搜索唯黃費我推敲抹去若干存來十一欲望收拾在後子孫莫若流傳先自朋友其情甚為可憫祝希哲贈詩云書抄滿篋皆親手詩草隨身半在舟沈啓南題豪云雖止百篇諸體備不拘一律大方諧惜乎其彙罕傳矣

支硎山再餞文交木太守

崇嶺達深邃芳漪激寒泉言尋支公蹤閱歷成千年鶴
飛遠青冥有亭尚歸然草木屬孟夏山水尤清妍祖餞
此云再廣林啓長筵

泛吳江

一帆風便到吳江江上飛來白鳥雙舟子飯時吾夢覺
起看新月坐蓬牕

倪光一首

光字應奎鄞縣人有味易詩集

李杲堂云先生感土木之變學孫吳書講劍術

既久無所合乃更學易學者稱為味易先生古詩效初唐音格流麗近體不減王右丞句如路柳官橋晚山花野店春平林藏宿霧疎雨帶春潮真不亞

盛唐也詩話相傳味易能前知游京師於楊文懿邸中有中使突至先生見一雀自庭樹集于地已還集樹即謂使曰頃來得非因失馬邪六日當復使大驚文懿質之對曰雀踴躍物也去樹而集於地舍所依也還集樹復其所矣初集自北而南水數六故曰六日當復又問馬色曰以水克火當黃而近于黑中使曰然客有問婦將產者傘忽裂其人失色先生曰傘忽裂則小人見君得子矣其學蓋本於邵氏觀梅數詩特娟秀不襲擊壤

惡派

宿清村

地闊江流險天空山勢高望鄉雙淚落為客一身勞斜
日飛沙鳥西風動野蒿一舟依岸宿深竹夜騷騷

燕遺民 三首

遺民字逸德自號雲谷老人蒲圻人累以賢良
徵高卧不起

詩話遺民詩頗蒼老惜遺集無存
僅從通志總志中錄得三首而已

感興 二首

寥落湖山曲憑誰話起居出門惟水石相見但樵漁酒
熟還堪漉園荒欲自鋤久深泉石想早晚賦歸與
泉谷煙花淨林塘暑氣清幽花籬落見好鳥竹間鳴禾

黍皆豐稔桑麻自長成還聞茅屋底燈火讀書聲

九日

細雨柴門靜青山客路長黃花應笑我無酒過重陽

天

自云語不在
深悠然自遠

章 珍 一首

珍字文重鄞縣人

李杲堂云文重以布衣宿望
為里中五經師不媿真隱

無題

溪橋春水生新蒲綠堪把茅屋掩松雲斜陽鳥飛

陳 穎 一首

穎江陰人以善楷書舉歷官按察僉事

題湖州慈感寺

過溪纔百步橋轉入禪關高閣斜臨水平林遠見山波
光隨鳥度秋色共雲閒深愜幽人趣遲留忘却還

黎 擴 二首

擴字大量臨川人以薦授貴池訓導升蘇州府
學教授

西壩草堂為廬陵宋內翰賦

聞說西谿上春風小院開野蠶成繭盡江燕引雛迴竹
裏圍碁局荷香沁酒杯晚涼疎雨過隨意步蒼苔

送人還盱江

新涼生白苧游子倍悽然客思秋砧外鄉心旅鴈前西
風千里道斜月五更船亦有還家夢隨君到汝川

張淵

一首

淵字子靜歸安人有鴻墩集

詩話子靜孝子也母失明朝夕舐之父好飲醉或罵詈則握髻請解長跪移時里黨稱之晚游四方與沈啓南史明古僧月舟最善湖州勞太守鉞府志其手筆也其居在雙林之鴻墩故詩集以是名

題白石翁畫虞山古檜圖

虞山老檜三株青斗壇半掩招搖星道人丹成化鶴去
三檜夭矯飛龍形是誰手植經千載曾見昭明讀書在
幾迴天上葬神仙不獨人間變桑海古人今人繞樹行
古今人去樹長生乃知勁氣合元化不與凡木爭枯榮
長洲老石好異者百里攜杯游樹下浩嗟天下有樹此
樹無我去此樹何人圖三日經營雙眼力滿空蒼翠移

真跡鶴骨虬筋左紐文雷裂霜皴古秋色日暮袖歸歸
不得滿山風雨山靈惜居然贈與卧雲人長嘯寒風生
石壁於乎石君詩画天下知此筆尤為天下奇勸君風
雷當掩戶恐化蛟龍擘空去

程文杰

一首

文杰字思周休寧人有湖山吟藁

行路吟

有酒且莫斟聽我行路吟風霜滿面塵滿襟古皆然匪
獨今我勸君君毋怒今人行是古人路古人一去豈再
來笑殺今人不回顧朝行吟山沉沉虎狼關隘龍窟深
暮行吟木陰陰江南鷓鴣無好音行人莫道行路好多

少行人路中老

詹貴一首

貴字存中休寧人有竹南集

商婦吟

莫作商人婦商人慣別離門前竹王廟日日卜歸期

莫藏一首

藏字用行士林詩選作恒海鹽人有素軒佩觿二集

閨怨

雲母屏空怯曉寒懶臨青鏡舞孤鸞滿庭風雨無情思
開到梨花不耐看

莫遯一首

遯字用嘉藏弟

登六和塔

浮圖百尺倚天開落日珠林鳥雀哀王氣已銷龍戰後
山形猶似鳳飛來茫茫雲海迷蓬島渺渺江湖接釣臺
回首西湖倍惆悵南朝陵墓盡蒿萊

陳金一首

金字用礪海鹽人博野知縣

寒食書懷

江上客居三十年每逢寒食一淒然青山笑人不歸去
白髮滿頭徒自憐茅簷幾處插楊柳梨花半開聞杜鵑
身世崎嶇杜陵老夕陽風浪洞庭船

劉泰 二首

泰字士亨錢塘人有菊莊晚香二集

湖上暮歸

小驀馱醉踏殘花柔綠陰中一逕斜日暮歸來問童子
春衣當酒在誰家

小景

雲溪一帶淨無沙門對青山是我家幾日不來亭子坐
東風開過紫藤花

王寬 一首

寬字敬敷東陽人龍南教諭有建南橐

解任歸書草萍驛

三月草萍驛風花點客衣春山啼杜宇也道不如歸

舒鑑 一首

鑑字孔昭自號東海釣叟紹興人有恪齋集

寄雲城知己

琵琶洲畔白雲城紅樹千行隔短亭塵迹自悲衣欲化
故交誰復眼長青江空木落雁初度院小燈殘酒半醒
終夕相思不相見碧山寒月照疎櫺

羅養蒙 一首

養蒙吉水人

感興

勳業飄零梅子真江山誰與訪遺塵艱難獨不悲前事

慷慨徒勞憶故人太乙圖書元在漢東周禾黍半歸秦
晴天玉筍秋風上欲薦蘋花淚滿巾

李宗一首

宗字德紹江陰人有雪窗家藏集

望亭驛和唐李從一韻

迢迢野草接青蘋一望淒然淚滿巾幾處樓臺荒舊業
五湖風月屬何人寒烟半鎖江村晚野鳥空啼驛樹春
惆悵亂離前代事不堪寥落總成塵

施鈞一首

鈞字則夫紹興人

謝太傅祠

晉室將傾不易支先生出處繫安危山間紅袖從游口
天下蒼生望起時風暖松亭春載酒月明花墅夜圍碁
轉頭樂事無尋處空拂青苔讀古碑

時用章一首

用章常熟人

遠回吳中

挂席看山興不孤西風吹我近姑蘇城高暗壓要離墓
水闊遙連范蠡湖野店喚沽雙酌酒漁舟爭賣四鰓鱸
故鄉咫尺明朝到十載離愁一旦無

喻省一首

省字伯唯南昌人常州府同知

送友人

梅花殘雪照晴川立馬郵亭思惘然
媿我飄蓬仍薄宦與君分手正殘年
一樽行色沙頭酒千里鄉心月下船
垂老莫言歸計拙綠編研北是良田

張鎬一首

鎬寧波人

為李景陽題便面

高樹落涼陰幽溪漾晴碧山雨夜來多
苔痕上磯石

陳焯一首

焯字惟大一作文厚閩縣人有棲雲集

攬秀樓

何年構此山之東八牕相對山花紅
桐山居士老解飲何當置我新樓中

顧寧一首

寧字季康鳳陽人自號夢鶴生

入山雜言

杖藜入山中悠然澹忘歸白雲靄前途
行行穿翠微林幽鳥聲寂地僻人跡稀
惟時歲云暮黃葉紛以飛石罅寒泉鳴
草根朝露晞撫景自怡悅暫忘塵世機
石壁挂我巾松風吹我衣將期二三子
於焉歌采薇

季達一首

達字兼善自號竹圃道人青田人

過臨江府

故人別後思何堪獨倚河亭酒半酣自笑不如雙燕子
春風先我到江南

吳敏 二首

敏字思德號袖莊吳縣人

洗河

洗河水落秋風早菱葉蕭疎菱角老河邊漁船如缺爪
白頭夫婦團圓好往來賣魚兼賣菱官府近無漁課徵
夕陽醉卧風吹罾

沽頭插

浮葦生根上陡厓牛羊原隰有人家縹車聲響南風裏

棗樹青青落白花

王昇 一首

昇字廷禮號玉澗生長洲人

讀曲歌

朝憶復暮憶展轉無消息芙蓉顛倒生蓮子中心側

杜嗣昌 一首

嗣昌字繼文號勉齋吳縣人

詩話正統中吳郡徐庸用理取永樂以後詩編為湖海耆英集一十二卷大約吳人居其什九其發凡云斯集之作間取亡友杜繼文姑蘇集中者而合成之今繼文姓名吳中罕有知者無論其遺書也長洲馬醫公素輓詞云寄我詩為遺世物養親錢作葬身資包山蔡昇景東輓詞云半世才名一丘土六經事業九重泉蓋亦篤學之士詩雖不見好錄以存其人

題画

秋風嫋嫋露團團朱箔銀樓鎖夜寒一曲鳳簫明月裏
玉人何處倚闌干

徐章一首

章字德彰號省軒吳縣人

貧居

薄田日已荒舊業日已替困蒙三十年良由寡生計人
非無交游貧賤易相棄周周與蛩蛩飢渴尚相濟所以
簞瓢人傲焉不狎世處之苟能安其樂有真意

曹侃一首

侃字仲雍號竹齋烏程人

詩話仲雍詩集罕傳其詩有摹張夾儀青弁山居圖贈鳳林嚴十七蓋
永宣間善山水竹石者也北宋有曹孝子清嘗代父予聞之鄭芷畦云
重辟刑於金陵浦白沫尸泝流還家至今專祠類宮其子孫散居苕東
之西陽村族最蕃多務農桑罕通文墨湖海耆英集云仲雍苕東人豈
其苗裔邪同時有曹謙字鳴吉亦能詩

寫竹贈戴山黃方伯

昔游湘浦泊蘭橈萬玉森森宿雨消記得推篷涼夜永
月明一曲紫鸞簫

任道一首

字里未詳

画菜

露芽烟甲曙光寒紫翠溥香濕未乾記得花時曾病酒
上人纖手薦春盤

明詩綜卷二十四

小長蘆 朱彝尊 錄

秣陵 胡任輿 緝評

桑 悅 六首

悅字民懌嘗熟人舉成化乙酉鄉試除泰和訓

導遷長沙通判調柳州有思玄集 王元美云桑民懌如洛陽博徒家無

擔石一擲百萬 胡元瑞云民懌高自矜謂其詩體格卑弱可謂大言無當 俞汝成云思玄居士負氣自高凌厲一世其詩賦類多率情有翫世自嘲之意可以資暇啓顏者亦復不少

靜志居詩話民懌說易謂萬物莫逃乎數說詩謂刪後無詩率本堯夫之餘唾其於律呂亦拾蔡氏之陳言才識平平爾乃敢大言述道統論則曰夫子傳之我作學以至聖人論則曰我去而夫子來居然以孟子自况而非薄韓子比其文於小兒號嘍其在長沙著庸言自謂窮究天人之際非儒者所知而曰吾詩根於太極天以高之地以下之山以峙之水以流之庶物以飛潛動植之日月宣其明雷霆發其震雨露播其

潤澤散之則同元氣流行收之於心發之於言被之管絃則可感天地
動鬼神乾坤毀日月息詩迺收聲夜歸太極其言大而夸狂也幾於恃
矣

感懷

逝日不可追誰能駐光景春陽媚花草荏苒歲華冷威
鳳德未成颯下丹山頂路逢清冷泉徘徊照孤影
東園有奇花容姿鮮灼灼雖是春風開亦是春風落甘
霖被郊原蔓草輕蘭葯所以高岡松無言倚寥廓

住龍福寺

龍福山虎形有寺枕山陞僧衆暗吞噬一二留披緇注自

形家言

法堂久欹傾羅漢無完肌空階劃鳥跡香案縈蛛

絲如此我了催科業僧榻苦栖遲月黑響蝙蝠風定聞狐狸

微官責聚斂百賦皆有期長沙病逋負此州更難醫譬
如理亂髮恐傷首中皮膏油漸浸潤緩緩施梳篦審知
曠厥職恬退乃其宜妻孥先遣發岳麓不日辭幸逢中
丞賢加禮免鞭笞言語如春溫勉令撫瘡痍徘徊不忍
去我亦為我嗤憶昔少年日許國師皋伊豈知坐冗職
出納伍有司與民算升斗瑣屑誠堪悲登山拜虞舜臨
淵弔湘纍終當拂衣去涕泪陳吾詞

題鳳洲草堂效吳體

江水四面圍高丘艸堂結在丘山頭頻經春雨打不漏
苦耐秋風吹未休枕邊驚聞櫓聲過檻外俯看雲影浮
我約吳郎來借住并吞沙草占溪鷗

過十二磯在梧

亂石危磯急瀨聲扁舟汎汎水中萍月當秋夜十分白
天到遐荒一倍青引路哨船鳴鼓吹前山軍堡出旗旌
回頭便有開懷處無數峰巒列翠屏

題画

浮雲出沒吞遙岑小亭日日巢秋陰美人如玉不可見
松子自落空山深

懷遠道中

蓬蒿没馬路通身在野真為艸莽臣莫道先生無武備
前驅負弩盡狗人

文 洪 三首

洪字功大長洲人成化乙酉舉人署涑水儒學
教諭有括囊藁

詩話長洲文氏世載其德希素先生實始之句如野猿窺落果林蝶戀
殘花自得翻書趣渾忘對客言饒有恬澹之致傳之交木甫田高曾之
規矩不
改也

睡起

寂寞掩林扉東風晝方永睡起落紅多斜陽半樓影

南行舟中

露白沙涼月滿空鴈聲歷歷度西風客程尚與鄉關近
歸夢如何便不同

訪徐尚容

虎谿谿上草堂閒千樹江梅杳藹間欲向南枝問消息

東風吹我過西山

羅倫一首

倫字彝正永豐人成化丙戌賜進士第一授翰林修撰坐論事貶泉州市舶副提舉尋召還復職改南京有一峰集

詩話一峰以論南陽奪情事謫廣東市舶副提舉實學士陳文所書策也久之復官南陽已謝世既而文死薛御史之綱作詩誦之曰九原若見南陽李為道羅倫已復官然李公賢相贊裕陵釋建庶人居之鳳陽許其自便即此一事啓沃已多亦未可輕訾也一峰專心理學詩不與韻士爭長而集中紀夢詩多至三百餘首難乎免於躋矣

節婦歌

泉流不歸山雨落不上天妾心死不回金石無其堅白日經中天飄忽沉西海妾心日不如瞳瞳光不改明月

揚清輝三五二八圓又虧妾心月不如耿耿無虧時憶妾二十春結髮事良人安知三載後羅帷生素塵懷中五歲兒零落重悲辛吾聞陳孝婦夫死養姑心愈固朱幡入奏丹書來黃金北斗高門戶又聞杞梁妻慟哭梁山傾精神變天地黃主非無情妾髮可剪妾頭可截妾心之白不可涅

詩話一峰節婦歌初不詳姓氏別本或加張字或以為節婦甄氏作誤也詞亦小異

程敏政九首

敏政字克勤休寧人成化丙戌賜進士第二授翰林編脩進左春坊左諭德兼侍講歷詹事府少詹事兼翰林侍讀學士掌院事遷禮部右侍

郎卒贈尚書有篁墩正續稿

李時達云篁墩著述甚富體格不高

詩話篁墩數與西涯和集中存詩數千究之警策至其緝錄諸書若明文衡新安文獻志甄綜有法餘如宋紀受終考宋遺民錄皆有功史學獨是議孔廟祀典而屏鄭康成不與未免過於刻薄若夫蘇氏構杌一編謂着山父子罪浮於王安石蓋借文公雜學辨而周內之其意第欲為伊川復讐不知徒貽有識者笑也

懷平江伯陳恭襄公

赴赴陳將軍平江始開國小年八石弓勇氣屢破賊竭
逢中興主得附昇雲翼當宁念豐鎬京邑望南北安得
蕭與韓晏歲足兵食將軍家合肥老大諳稼穡一朝被
簡知舞蹈奉明勅建牙淮水陽諸路盡承式孜孜竭衆
智疏鑿靡餘力厥庾便交輓隄牖濟危嗇艘舸隨淺深
湖壩幾通塞百年民力蘇萬里海濤息居然莫東南不
復困供億將軍去幾時寢廟見顏色火旗與雲馬夜下
不可測父老說遺事往往動遐憶征夫多苦辛國本在
培植賢孫今代將當復守成則東風吹客衣清口日初
昃公忠夙所欽再拜續銘刻

蹋車行

田夫蹋車如蹋弩田婦蹋車心更苦老天不雨將奈何
稻隴看看作焦土我行見此三歎息欲助農忙恨無力
假令一早似往年豈獨憂貧復憂賊我雖七尺金紫身
聖恩許作歸耕人詩書不了餬口計與爾將來同苦辛
擊鼓揚旗禱神福且莫先憂食無粥賢侯恤民天所憐
好雨時來歲還熟

功臣廟下作

雞鳴山側英雄坊朱門半掩青松長功臣廟食自洪武
下車進謁開中堂元勳佐命推六王儼然並坐徐與常
左李右鄧沐最少霜鬚獨見東甌湯秉圭服冕垂衣裳
異姓聯翩如鴈行公侯十六分兩傍金貂玉帶相輝光
瓣香一炷三歎息却走苔堦觀画廊竭從真主興濠梁
長江飛渡入建康血戰往往皆鷹揚當時陳寇號最強
諸軍一刃番水陽不日降旗來武昌神威自此若破竹
僭竊次第歸天亡按圖未取東海方下令先縛鹽城張
遠清閩廣服蠻徼繼下滇蜀連氏羌東南略遣瘡痍息
直指幽都驅犬羊羶裘北遁居龍荒乾坤一統成帝鄉

九州入貢紛梯航文孫繼承萬億載諸將之功何可忘
禮官四時奉蒸嘗令典與國同無疆摩挲丹青落日黃
一時際遇思明良陸機有頌媿莫續風雲颯爽天茫茫

暮雨野泊

黑風摧山雨如注未到下邳無泊處暗中雜遝人語聲
且逐淮南漕舟住淮南漕舟三百強粉字舵樓成堵墻
輪更轉箭鎮相續似覺人人嫌夜長滅燭悠然倚牀坐
遠村曙雞聞一箇前途早有役夫來岸東相呼岸西和

送黃欽都閩出守洮河岷三州

前歲平遼過海東今年分陝駐湟中三城斥堠提封遠
千里蕃戎節制通開府欲施經濟策留屯先上便宜功

從來禦侮須才俊莫向沙場歎轉蓬

度東山嶺

石橋駐馬問田翁一塢深深隔樹東帝子閣前沙似粟
埜神祠下路如弓疎松古礧風微動細草陰厓雪半融
回望紅塵才數里不知身在亂山中

海子

十里城陰道西湖一派分秋晴沙岸尾時見白鷗羣

送克寬弟南還至茶菴獨歸

垂野陰雲一望迷送行愁問路東西不知幾日黃梅雨
門外青泥沒馬蹄

題小景雜画

綠樹蕭然蔭草亭酒船安近蓼花汀分明一夜溪頭雨
洗出春山數點青

莊 泉 五首

泉字孔暘江浦人成化丙戌進士改庶吉士授

簡討以諫謫桂陽判官遷南京行人司副終南

京吏部郎中天啓初追謚文節有定山集

李世賢云定山詩好用乾坤字 楊用修云定山早有詩名顧有絕可笑者如太極圈 兄大先生帽子高贈我一壺陶靖節還他兩首邵堯夫又贈我兩包陳 福建還他一匹好南京聞者捧腹然晚年詩入細竟有可並唐人者 俞汝成云莊定山詩雖不步武唐人而去時調則遠 王元美云莊孔 賜佳處不必言惡處如 村巫降神里老罵坐

詩話湯養義仍好填詞人或勸之講學湯云僕終身言之顧諸公勿省耳 諸公所講者性僕所言者情也旨哉言乎自昔袁衣陳詩章甫雅言言 之聖賢類不廢詩至曰女心傷悲殆及公子同歸又曰其新孔嘉其舊 如之何抑何其婉曲入情也自堯夫擊壤而後講學毋復言詩言詩輒

祖堯夫遂若理學風雅不並立者然一峰康齋白沙定山咸本擊壤而定山尤甚所謂太極圖兒大先生帽子高等句不一而足以是為詩其去張打油胡釘鉸無幾矣甘泉從而輯之以詔學者謂非此則與道學遠也然則打油釘鉸反為近道之言而詩三百篇春女秋士之思皆可置勿錄也竊為理學諸先生不取也

憶舍弟

天邊聞一雁杳杳向南徂今夜西風冷他鄉小弟孤
五千里去九月一書無欲作千行淚憑誰寄客途

題画

遥山青兩峰老樹紅一葉我懷不可羈月明江獨涉

空江下明月

送博羅何孝子

白酒江門暖北來風正寒釀方君不錄明日寄書難

釣魚圖

溪上春雲與浪飛溪頭春水鯿魚肥野人只是閒無事
日出船來月出歸

寄壽州廖同知

江鄉煙景不須爭客裏風花亦有情我見白頭張汝弼
今年又在壽春城

黃仲昭一首

仲昭名潛以字行莆田人成化丙戌進士改庶
吉士授編修坐諫鰲山煙火予杖謫湘潭知縣
遷南京大理評事進寺副乞休弘治初起江西
提學僉事尋致仕有未軒集

劉玉執云之生遺文闕理者微微諸事者核

窮物象之真吟
味得性情之正

詩話僉事以詞臣建言宜有巖巖氣象而詩特和易近人其論居寫懷
也有云一片歸心留不住非因故國有尊鱸其歸田雜咏也有云悔殺
昔年成底事紅塵鞭馬聽朝鐘其澹於世味也可見已初自號未軒羅
彝正謂曰君之未余知之吾道未至於孔孟吾功未至於伊周吾民未
至於唐虞君之未也若士未大夫大夫未公卿則眾
人之未也晚居下皋築俱樂亭更號退巖居士云

明妃詞

風起龍堆滿面沙舉頭何處望中華早知身被丹青誤
但嫁巫山百姓家

章懋一首

懋字德懋蘭谿人成化丙戌進士累官南京禮
部尚書贈太子少保謚文懿有楓山集

詩話楓山自言不工於詩故集中存者甚少嘗見忠陵御書一幅詩云
未央鐘動曙先生隱隱初聞柳外鶯風靜御爐香篆細日烏谷座交衣

明蠲頭陸擁黃麾仗豹尾班聯白玉珩最喜及時勤庶政蒼蠅聒裏聽
雞鳴真跡存高上舍佑鉅處觀者疑為思陵御製實楓山集中詩也淮
及時二字集本作君王御筆更之是楓山一集
曾歸乙夜之覽矣附識於此以當開寶舊事

遊牛首山和沈仲律韻

乘興來山寺清尊共解顏院深春晝永香裊午風閑短
屐行應遍危欄倦亦攀白雲飛不定何處是鄉關

張弼十首

弼字汝弼松江華亭人成化丙戌進士授兵部
主事轉負外出知南安府有鶴城東海二臺

之云東海詩清鍊脫俗力追古作其自評書不如詩詩不如文此英雄
欺人不足信也 王濟之云東海詩不苟作必超詣豪宕擺脫近世
尋常語 王子衡云先生詩
氣豪而逸發乎性情之正

詩話汝弼詩云酒杯不及陶彭澤詩法將隨陸放翁故其律體全學劔
南如魚兒浦口酒船小燕子風前茶焙香酒遇故人隨量飲花當好處

日言錄卷二十四
九
及時看自從都下三年別不寄江東一紙書孤艇夕陽荷葉亂小樓春
雨杏花殷鬢毛零落風前鷺心緒悠揚簇上蠶一頃新田收晚稻數椽
茅屋補秋蘿浪花作雨汀煙濕沙鳥迎人水氣醒萋萋芳艸日將暮點
點飛花春可憐縹水入春冰半黑平山消雪艸微青西飛白日忙於我
南去青山冷笑人草露松風千里夢秋霜春兩百年心僧中今見大小
朗世上爭傳長短歌霍光有傳何曾讀疏廣無金亦自歸可稱具體與
壤者不同也

紅梅贈翁僉事

庾嶺小紅梅風標天下絕昨日幸同歡今日傷離別玉
筵兩三聲吹落臙脂雪寫以贈知心相攜共明月

咏竹

擊節歌離騷湘靈招不得開門看月明幽篁倚蒼石春
風千萬花花落春無跡此君冷淡姿常有好顏色

假髻曲

東家美人髮委地辛苦朝朝理高髻西家美人髮及肩
買妝假髻亦峨然金釵寶鈿圍朱翠眼底何人辨真偽
天桃窗下來春風假髻美人歸上公

宜興好寄弋陽尹李端卿兼柬諸公

吳中山水宜興好曾在京華得飽聞踪跡十年嗟未到
風煙一壑要平分筍鑊茶塢銅官雨荷蓋蘭舟泝泝雲
更問東坡田可贖便教兒子蚤耕耘

棠溪景

悠悠下村路望望皆煙樹何處讀書聲山禽忽飛去

送張維亨之沂州

瑯琊臺下看新晴聽得陽關第四聲千樹梅花滿城雪

也應難比使君清

俞舜卿僉憲許柑未送詩以促之

南海黃柑未見分
舉杯空望嶺頭雲
元宵燈火相將近
空手歸來惱細君

絕句

空濛山色晴還雨
繚繞溪流直又斜
短杖微吟過橋去
東風滿路紫藤花

方文美画

花落春歸客未歸
仲宣樓上倚斜暉
故園遙在三江外
綠遍蘼蕪燕子飛

題画

雲杉如薺屋如蚶
詰曲溪流瀉碧潭
獨立小橋吟不盡
插天晴翠太湖南

賀 欽一首

欽字克恭廣寧人
成化丙戌進士官
給事中天啓初
追謚恭定有醫問先生集

春晚

落盡羣芳枝已空
游人枉自怨東風
誰知寂寞幽園裏
猶著楸花一樹紅

林 瀚一首

瀚字亨大閩縣人
成化丙戌進士歷
官南京吏部尚書
贈太子太保謚文
安有泉山集

詩話文安公父元美中永樂辛丑進士仕至撫州守以循良聞公有子九人康懿文僖官皆至尚書諸孫為尚書者復二人其他階大夫郎者不數焉門閥可云盛矣公爛於制舉藝吾鄉姚處士澣哀集明一代時文三百八十家特推公為之首詩不耐深思然一門濟濟儒雅風流不特三世五尚書有集而已

寄鄭郎中

鳳臺一別四經秋羨子投閒未白頭為問濂江江上路
幾人煙雨櫂歸舟

李

傑 十五首

傑字世賢嘗熟人成化丙戌進士改庶吉士授

編修累官禮部尚書贈太子太保謚文安有石

城山房橐

胡世高云宗伯詩文明暢醇雅渾厚和平悉從經學流出未嘗為鈞棘詭亢之言以驚世取譽自然從容於槩

中

詩話張乖崖詩云獨恨太平無一事江南間殺老尚書虞山李文安以忤劉瑾致政歸築逸我堂壘石為山暇游昆尚二湖賦詩云虞山山下是吾廬三載棲遲得自如却怪四方多事日江南間殺老尚書蓋其時山東江西四川湖廣盜賊並起故為是言也文安不以詩名然與李文正吳文定諸公酬和不輟其自序云余於詩文初無師授亦未嘗規倣古人將以是名世但竊慕詞垣公私所需不容已爾故意之所到信筆書之未嘗刻苦思索必求其工也可謂得失寸心知矣
錢氏列朝詩集搜羅鄉曲先進靡遺獨不及文安何哉

早行舟中有作

荒雞一再號東方漸生白眾星尚駢羅天宇黯以黑晨
光正蒙昧莫辨河山色舟行趁潮長寧費牽挽力蘆汀
鴈驚起鳴聲何嚶嚶輕颺拂涯樹涼露時一滴前村燈
火明茆屋疎林隔蓬窗攬衣坐悠然忘盥櫛宵征自可
怡此景更奇特

登泰山絕頂

明言集卷之四
五嶽鎮坤維其東雄秦岱巖巖一何高屹立霄漢外神
靈所攸鍾秩祀宜萬代我來屬深秋登陟覽勝槩雲開
旭日升峰巒新染黛盤盤上澗谷石磴豁復隘涼飈起
虛谷颯颯響靈籟兩崖戢霜樹爛斑殊可愛五松非秦
封亦已類偃蓋躋攀入天門縹緲凌上界睇盼感廢興
喟然發長嘅七十二帝王封禪遺跡在玉檢時復出厓
礪亦殘壞茲山自今古直與穹壤配絕頂氣益清衣袂
浮沆漉羣山紛後從歷歷同聚塊中原小如甌滄海縈
若帶置身九重近誰謂天下大吾言良匪誇聊以志一
快

泰山竹林寺與陳大叅楊僉憲同遊

陟險千萬盤未識寺門處一澗委蛇來齒齒亂石聚飛
梁忽橫亘清泉下奔注其間有靈湫蛟龍所蟠據時經
不測谿心動髮毛豎肩輿尺寸進僕夫汗如雨我欲飛
步登厓傾足難駐青鞵與布襪惜不攜此具貪奇不知
止竟忘垂堂慮緬懷得一樂未足償千懼峰回見林薄
飄然發佳趣古殿三兩楹滿庭蔭高樹百果經秋霜甘
美皆可茹同行得二妙把酒勸酬屢酒酣陟巘崿冀與
仙靈遇高寒覺衣單俯視飛鳥去白雲出巖阿英英若
春絮登臨興無限日暮歸何遽摹寫詎能窮率爾成短
句

秋崖

秋山鬱岌懸崖削如壁自非插羽翰可望不可即若
人何好奇捫蘿每登陟濕雲潤我衣落葉墮我幘逍遙
空青外似與塵世隔便欲御冷風飛行覽八極

題王孟端松泉圖次饒介之松濤韻

山椒怪石蹲如羝松崖巉巖不可梯蒼濤洶湧翻地軸
白日晦冥天爲低高枝棲鶻巢欲墮哀鳴何處求其雌
初疑龍蛇相格鬪鱗鬣無乃多傷夷又疑羣仙互來往
翠旌羽節紛祁祁影作大陰連巨壑根蟠絕澗滋寒漪
何人圖此心獨苦九龍山人揮灑之筆端生意妙莫測
真宰上訴天應悲驚風颯若坐間起毛骨凜凜難禁吹
林泉逸趣我所嗜相對不覺心神馳世間真假俱一夢

以夢非夢良亦癡臥遊何必謝公屐千峰遍閱消移時
畢韋一去藝中絕後代未聞工者誰山人能事寧止此
布衣上結明主知圖窮載誦醉漁作此翁胸次亦已奇
歌聲悲壯意超脫不似杜老憂時危豈期兩美偶相合
有聲之畫無聲辭百年勝賞不易得俛仰忽復令人思
雪泥鴻爪宛然在風流雲往何由追後來視今今視昔
揮毫試和松濤詩

題謝廷循山水

峰高遲出日山氣曉氤氳葉潤林藏霧崖分谷吐雲客
衣晴亦濕瀑響遠逾聞茅屋依深樾逃虛羨隱君
遊靈谷次鄭司徒韻

吾愛山中筍蕨甜山靈况復不吾嫌日華濃染緋桃色
雲影輕籠翠柏尖尊酒興催詩興發管絃聲與鳥聲兼
韶光滿眼供春望分付奚奴爲卷簾

過蔡村

白沙灘接綠楊堤遍野青黃麥秀齊萬雉都城天咫尺
幾家村落水東西濛濛細雨來帆重漠漠平蕪去鳥低
岐路年年成底事遣懷只合醉如泥

奉祀天壽山

有序

五月十三日上以亢旱命臣傑祭告天壽山之
神晚至昌平雷雨忽作次日四鼓祀畢出陵月
色如晝歸至沙河回望西北諸山雲氣變隼流

水已沒斷橋矣十六日京師雨十七日大雨畿
甸霑足賦詩志之

玄雲四合雨傾盆朝野歡騰頌至尊已藉靈祇通上帝
自應列祖祐神孫禾苗漸發高低壠草樹重榮遠近村
猶記昨宵祠禱罷滿山明月照陵門

孔廟紀事次西涯李閣老韻

至聖由天縱斯人足典刑道高王只素文在簡猶青秩
祀從先代尊榮合萬齡廟堂森穆穆金碧煥熒熒回祿
噓妖沴炎光迫紫冥忽驚空邃宇倏已及前庭古壁殘
遺冊穹碑剝舊銘蒼煙隨燼滅焦盞逐風零寧記諸賢
像誰摹老檜形衣冠猶在望絲竹杳難聽驛報來東郡

封章入大廷，聖情深隱測。睿旨重叮嚀，祭告誠宜達。趨
踟職所丁，瞻依懷闕里。對越想英靈，大宅門墻峻。高林
艸木馨，尼山遙可覩。泗水近須經，衣露常沾潤。帆風渺
御泠，郵程占夜月。征旆帶晨星，傳詔修香幣。騰書具鼎
劔，莖芽行漢禮。作器象周型，祭統寧教墜。天機自不停
春陽發壇杏，和氣長階蕙。揆日營新制，推波濯醜腥。巖
巖增壯觀，翼翼闕重編。儒道今滋盛，文風被八溟。

題扇

竹徑清陰合，行行路欲迷。仙家何處是，只在石橋西。

雜興

花霧曉濛濛，濛濛落紅飛不起。文采雙鴛鴦，蕩漾綠池水。

次徐文量主事韻

西風獵獵走驚沙，歲晏登臨倍憶家。爭似南州徐孺子，
寒林匹馬看梅花。

謝鄭東園惠荔枝用原韻

閩中佳品數方紅，蜜漬鹽蒸恐未工。曾聽詞林前輩說，
岳季方葡萄風味略相同。

題倪雲林竹

倚風寒翠不禁吹，秋盡瀟湘暮雨時。極目蒼梧魂欲斷，
隔江休唱竹枝詞。

徐恪一首

恪字公肅，嘗熟人成化丙戌進士，累官南京工

部右侍郎

朱仙鎮岳王祠

汴洛淒涼寢廟空中原恢復仗英雄黃龍未遂長驅志
鐵馬猶傳轉戰功貔虎散歸烽戍老河山遺恨古今同
西風一掬懷賢淚灑向荒祠夕照中

陸容一首

容字文量太倉州人成化丙戌進士授南京吏部主事改兵部坐言事出為浙江右叅政有式

齋集

詩話叅政與張亨父陸鼎儀齊名號婁東三鳳詩皆非所長式齋則至
登第後始為之見所述菽園雜記若其藏書之富見聞之周洽似非真
父鼎儀所能及也

感遇

松株青鬱鬱冬夏不改顏園工徇時好移或盆盎間屈
為虬龍形束縛苦不閒豈無培養恩適性良獨難吁嗟
梁棟材誤作花艸看愛之不以道何如老空山

戴縉一首

縉南海人成化丙戌進士累官工部尚書

楚江旅懷

薄暮過瀟湘秋空楚水長黃蘆千里月紅葉萬山霜客
夢懸雙闕鄉心逐五羊羈情誰與晤勞者若為傷

韓文二首

文字貫道洪洞人成化丙戌進士累官太子太

保戶部尚書贈太傅謚忠定有質菴存橐

何粹夫云先生

詩温如春風清如流水險韻廢和至數十首而句穩意新無牽強重累之病如層濤疊浪可喜可愕而無一不出於自然

詩話忠定公餘即事吟咏集中十九皆七言近體取自怡悅而已

西藍禪院

西藍禪院夕陽開古殿碑殘畫雜苔霜冷松林無鳥宿
月明竹徑有僧來霍山東抱諸峰合汾水西流九曲迴
老去未忘憂國念浮雲直北望燕臺

羅漢院

寺近孤村路轉西小橋流水夕陽低經霜崖果猿偷摘
欲暮風林鳥亂栖蛀粉尚留題壁字香灰半入種花泥
箇中老衲耽幽寂不為登山不渡溪

陸淵之一首

淵之字克深上虞人成化丙戌進士歷官布政使有東皋集

黃鶴樓

落日江流帶女墻飛樓百尺俯蒼茫筵前却怪當年事
鸚鵡何緣到楚鄉

潘蕃一首

蕃字廷芳崇德人成化丙戌進士累官南京刑部尚書

詩話尚書跋歷中外於蜀於粵屢立戰功以忤劉瑾被逮與劉忠宣同戍甘肅瑾誅復官優游林下簡朴如貧士時人為之詩曰尚書歸來無第宅稅地種花兼種魚舉網打魚魚換酒花前醉倒老尚書

吳越戰場

吳越興亡宛目前游屯涇上艸芊芊夕陽滿地生寒色
野燒緣溪斷暮煙麋鹿歌臺今往矣鷓鴣舞殿亦淒然
祇餘賜劔當年恨惆悵東風哭杜鵑

顏瑄 三首

瑄字寶之江陰人成化丙戌進士官戶部主事

有一菴詩抄

詩話寶之賦才捷敏嘗即內兄夏希明座上令侍女喬妙福捧硯王碧雲展紙和香山琵琶行韻援筆成篇不竄一字詩多穠縟七律頗近錢郎

過沛縣

獨坐篷窗對月明靜聞醮鼓已三更舟將泊處聞人語

驛未臨時見吏迎泗水亭前荒艸遍歌風臺上宿雲平
英雄回首今何在撫景空懸萬古情

登鳳凰臺作

鳳凰臺上雨初收天際涼雲拂地流萬里關河明落照
九重宮闕動高秋青山近遶城頭路紅樹深藏驛外樓
莫怪臨岐重惆悵青袍三載此淹留

宿河西務

漠漠煙光漸欲昏人家一半掩柴門鼓聲近報沙邊驛
帆影遙連郭外村紅斂夕陽微有迹綠浮春水淨無痕
怪來野趣難消遣自倚篷窗勸酒尊

樊阜 三首

阜字時登縉雲人成化戊子舉人官延平儒學

訓導有樊山摘藁

詩話括蒼山壤風雅之士寥寥獨縉雲樊氏門才頗盛時登而外曰敬公慎曰敘公倫曰源時濟曰通時亨曰昌永盛曰甫永美曰貴永芳曰鐸伯廣皆能詩叙有用拙藁源有竹軒藁昌有友菊詩甫有礪樂集貴有桂岡集鐸有畏齋存藁惜乎流傳者寡矣

田間雜咏

烏柏蔭我墻白茅覆我屋荷蓀朝出耘依依暮歸宿少
婦勤織縫諸孫解樵牧秋風禾黍收寒日照原陸鳥雀
啾啾鳴園籬多艸木官租及早償莫待里胥督

灣河舟中呈鄭廷韶吳景端

朝發燕山陽暮宿灣河側高樹蔚繁陰浮雲淡無色
彼西日馳憂心恒惻惻賴我同心人相期崇令德

馮公嶺道中書所見

馮公今去久嶺路至今聞紅樹邨邨雨青山片片雲野
橋松板架巖溜竹筒分日落人行少時參鹿豕羣

張昇一首

昇字啓昭南城人成化己丑賜進士第一累官
太子太保禮部尚書贈太子太傅謚文僖有柏
崖集

渡淮

長淮一道入滄溟滾滾黃流若建瓴回首故鄉何處是
春風多少短長亭

屠勳二首

勲字元勲平湖人成化己丑進士累官刑部尚

書加太子太保贈太保諡康僖有太和堂集楊應

寧云屠公屢更劇曹手不釋卷與余為文字

交居嘗過從必有倡和辭章之名播於中外

詩話吾鄉先正若呂文懿有子秉之屠康僖有子文升詩名皆勝其父

然兩公韻語亦自成家屠集如浦樹遠分揚子渡江風吹過石頭城吟

看雁影秋來早坐聽潮聲月上遲夢裏只疑身有翼燈前未信眼生花

江湖路遠身仍健天地恩深罪亦宜楚寺可能添一榻水田應只欠雙

鷗山腰樓閣天低樹江上人家水拍城八韻八句皆秀句一年一度此深杯均饒風致宜西涯篁墩守溪遂菴諸公交與和酬也

題画寄楊應寧

顏雲濕不飛釀作楚江雪林木凍已僵汀葦吹欲折荒
村煙火稀野寺鐘聲歇端居思美人千里成闊別天寒
鴻鴈宿地僻音塵絕囊琴誰共彈悵望頗鬱結貽此瓊
華圖聊以表高潔

小画

浦雲煙樹路盤紆白首青山興不孤我亦有亭歸未得
東風吹雨長蘼蕪

邵珪一首

珪字文敬宜興人成化己丑進士官至嚴州知

府有半江集李賓之云邵文敬善書工碁詩亦有新意如江流如白龍金焦雙角短又有半江帆影落尊前之句

人稱為邵半江

馬鬪虎

天門名馬真龍媒萬里新自流沙來先皇知爾才磊落
放入虎圈與虎搏霜蹄蹴蹋虎即斃英風颯爽來天際
當時觀者皆歎嗟唐家豈數拳毛騮

周瑛 三首

瑛字梁石莆田人成化己丑進士仕至四川右

布政使有翠渠類稿 林雨可云先生奇語奇情出之簡易嘗自題藁云老去歸平澹時人或未知當

為定評

履霜操

母兮兒憎父兮兒怒跼蹐天地憮不知其故父在高堂
兒在郊圻曩興履霜踵血淋漓荷衣不煖梲食不飽不
即捐溝壑念我父母父本兒愛母本兒怜一朝放逐實
兒之愆維烏有穀維蟲有羸父兮母兮其或歸我 羅子應云韓子

履霜操覺伯奇有怨怒之氣未免害義若翠渠作一篇之內吉甫惑於後妻之失既不可掩伯奇傷已自訟不敢怨怒而覲父母自省之意亦明詞婉意切足補韓子之失與拘幽操並讀可謂一忠一孝也矣

感興

持刀斫月光月光何曾斷縛帚掃樹影樹影依然滿人
皆惡樹影礙此月明多樹根苟不拔其如月明何

詠古送陳白沙歸南海

東都事矯激西晉尚清虛一時意自適社稷隨丘墟譬
彼門戶開轉運由其樞大勢一傾倒力救將何如君子
閱世多立說慎其初擇中而守固孔氏有遺書

馮蘭 一首

蘭字佩之餘姚人成化己丑進士改庶吉士仕

至江西提學副使有雪湖集 黃太冲云佩之在京師與西涯木齋雅相好木齋歸

田後與佩之唱和無虛日間書以寄西涯西涯輒和之有云惟應兩巾屨長得夢中遊又云羨君江海上猶有舊同遊是時西涯為一世宗工

而於佩之則
敬為老友也

詩話謝朓以宰輔歸田與佩之締姻日以詩札酬報澶淵劉應徵知
餘姚縣事為刊湖山唱和詩二卷集中句可采者謝如嘉客不來虛歸
榻好山難致即移家路當樹與雲深處舟及潮隨月上時野色遙連晴
樹杪秋聲忽動暮鷗羣樓臺月上寒雲盡村巷泥乾宿雨餘扶老最便
方竹杖入秋却愛早禾田馮如鏡裏流年從老去山中舊業得生還遠
林返照明村落斷岸分流入海田絕頂夜晴先見日中峰春暖易生雲
雨疎籬落菊開晚水涵湖田鴈下遲秋晚菜畦依水種日斜村嫗過鄰
春雲中僧住茅茨屋雨後人耕斥鹵田沙淨雨苔無屐齒竹深秋墅有
暮聲雷霆忽作三更雨江海疑生六月冰燈火誰家無樂事江湖此夜
有離人城市已無蹤跡到江湖合有画图傳其詩頗難優劣洵同調也

奉答木齋病起見懷二十韻

海氣明曙霞湖光渺秋昊十月木未霜楓林景逾好疎
疎籬下花寂寂澗邊艸閒居田事休委巷人跡少東瞻
牛屯峰秀矗雲之表種梅已成蹊中構一亭小謝公有
好懷藉此以終老佳辰縱嬉遊真境越清悄倚酣或高

歌興與秋空杳一臥動逾月予懷幾昏曉得詩知強健
頓紆腸九繞古人慎養生弭疾今須早周爰重勿藥莊
篇戒如槁金蘭久要義歲寒願相保詩古意與長三復
開素抱喜公眼增明萬象都了了南齋冬日暄遺編得
幽討擬尋亭上盟牽舟汝湖道梅溪香欲浮苔石淨於
掃扶杖我能陪公無笑潦倒

張習一首

習字企翱吳縣人成化己丑進士除禮部主事
歷負外郎出為廣東提學僉事

和石翁水悶

舊居忽異東西瀼白水茫茫不見鄰始下方林堪濯足

每疑汎宅僅棲身魚鰕易覓應兼味畎畝全沉已概貧
好鼓蘭橈放歌去乘桴浮海是何人

楊光溥 一首

光溥字文卿沂水人成化己丑進士有沂川集

春去

樓外青帘近酒家鶯聲巷陌夕陽斜東風暗地隨春去
幾日無人喚賣花

梅 江一首

江字文淵嘉興人成化己丑進士授廬江知縣
擢南京貴州道御史出為四川按察僉事

都門送弟還鄉作

高城曉角意如何執別離亭淚欲沱池館夢中青艸盡
鵲鴿原上白雲多西風苦憶歸帆影落日時聞鼓棹歌
最是明朝傷獨處寒山古木對嵯峨

呂憲 一首

憲字秉之秀水人大學士原子中成化辛卯順

天鄉試由中書舍人遷禮部郎中仕至太常卿

有九柏山房存橐

石邦彥云太常遊於二泉方石之門詩古澹冲雅微婉緼藉家居日對九柏吟咏不

輟忘其老之將至也

詩話太常詩名藉甚朝野特為吳中文沈諸君所推重人不敢以任子視之是時詩派方習為纖麗圓熟太常獨好盤硬語宜其傲倪一世也六十詩云治龔社酒分鄰父含笑山花付侍兒移病詩云官衙馬瘦無餘粟海國魚鮮正晚潮寄友詩云愁無却老青精飭夢有藏書白石龕皆瀟灑可誦

天寒夜臥

雨久當成雪天寒不肖明君親南北夢城闕短長更有病官何物無聞老此生茅茨築新屋妻子念歸情

吳寬十三首

寬字原博長洲人成化壬辰賜進士第一授翰

林修撰歷諭德左庶子少詹侍講學士擢吏部

侍郎累官禮部尚書兼翰林學士掌詹事府事

卒贈太子太保謚文定有匏菴家藏集李賓之云原博詩深

厚穠郁脫去凡近而古意獨存王濟之云匏菴為詩用事渾然天成不見痕迹洗盡近世尖新之習王元美云吳匏菴如學究出身人雖

復間雅不脫酸習錢受之云先生學有根柢言無枝葉其詩深醇醲郁自成一家

詩話匏菴與沈啓南史明古矜契最深車馬筵筮往還無倦其詩亦足相敵在都門關東園築玉延亭留容園中州木莫不有詩吏部後園亦

為掃除欄藥檻花暇必酬和極友朋文字之樂余嘗見公家選書偶有流傳者悉公手錄以私印記之前輩風流不可及也

讀廖司訓詩

先生撫州彥來為婺州師清晨坐高堂講席擁皋比弟子百數人出入矩與規先生以身教未嘗費言辭共云今人中得此胡翼之我友王允達托交兩無疑恨我不識面示我所寄詩詩長三過讀讀之竟忘疲其辭如劍鋒凜然白差差上憂吏治陋下憂士習卑三復先生言苦心良可悲欲將今世人化為唐虞時竊觀先生心卓爾出等夷但恐言太高反為當路嗤方今法宮中聖人貴無為一相久自擇謂能繫安危守櫝既有人自毀玉與龜諒非有言責勿起出位思幸卷三寸舌橫經固其

明詩卷三十四
宜撫州古名郡山川有諸奇艸廬與道園近世尚可追
著書寓微意足為千載垂再拜向先生吾言止於斯

送張都水

幽燕建都邑九鼎從而遷八政一曰食仰此東南偏歲
漕四百萬舳舻相後先雲帆罷轉海江淮達且沿迤邐
經齊魯有渠昔人穿噫此尋丈耳譬若溝澮然置牖以
啓閉相時為節宣巖巖魯山下平地多流泉泉流入漕
渠其始纔涓涓齋淪惟自足安知可浮船疏導非人力
濟世嗟何緣張君官水部治水思昔年往來相度之滌
源同九川功成既歸朝大臣慕其賢封章始朝薦行李
仍夕旋維此百泉眼利博人爭傳入渠有餘瀝可溉萬

頃田只今東方民老幼咸顛連槁項與黃馘嗷嗷口流
涎瀦洩倘有策旱澇何須憐漕粟國用足種粟民生全
他年司馬氏載入河渠篇

苦雨

入夏憂不雨雨甚又可憂幸此米價減宿麥且有收人
情稍覺舒天意復見尤一雨過三日其勢殊未休九市
成九河可車翻可舟側聞城西偏水患更不侔一家三
壓死傷者恐不瘳事急欲走避有足誰家投往夜東門
火平明失其樓雨來火不作火滅雨乃流漢儒傳五行
箕子敘初疇人邇天亦邇此理或可求賦詩遣孤悶廢
卷發長謳

謝屠公送西域眼鏡

眼鏡從何來異哉不可詰圓與莢錢同浮與雲母匹又
若台星然兩比半天出持之近眼眶偏宜對書帙蠅頭
瑣細字明瑩類椽筆余生抱書淫視短苦目疾及茲佐
吏曹文案夕未畢太宰定知我投贈不待乞一朝忽得
此舊疾覺頓失謝却撥雲膏生白訝虛室扁鵲見五臟
未必有奇術隨身或持此遂使目光溢世傳離婁明雙
睛不能沒千年黃壤間化此直百鎰聞之西域產其名
殊不一博物有張華吾當從彼質

鍾馗元夜出遊圖

終南進士狀醜醜虎鞞烏弁鳴色袍青天白日不肯出
上元之夜始出為遊遨鬼婦塗兩頰鬼子垂一鬣徒御
雜沓聲嗷嘈導以靈姑旗翼以大食刀離末罔兩不可
一二數肩擔背負手且搽戰傷人血化燐火各出照地
點點如焚膏陰風颯颯吹荒皋百怪屏氣不敢號汝輩
遠遁莫我遭我欲飲汝血甘如飲醇醪我欲啗汝肉美
如啗羊羔肯容汝輩在世長貪饕吁嗟乎馗也真為百
鬼豪所以唐皇想其像詔令道子寫以五色毫憶當天
寶年左右皆爾曹太真宮中逞狐媚祿山殿上作虎嘯
當時便須縛以蒼水使者所捫之赤絛獻於天閭尸諸
獸牢何為令溫泉生汙泥驪山長蓬蒿吾嘗疑其事展
圖不覺再把短髮臨風搔

送胡彥超

年過四十不作官還將短髮籠儒冠平生一經已爛熟
胡為挾入橋門觀前年鄉書名始刊曲江又避春風寒
重來橋門住三載打頭矮屋聊盤桓朝齏暮鹽不滿盤
何須故人勸加餐日高對案笑捫腹自有五色之琅玕
側身西北望長安眼中一朵紅雲團天門欲往澀如棘
若比蜀道尤云難嗟哉出處誰得似頗似吳下吳生寬
吳生作詩忽盈紙送君還到春闈裏春闈多士多如蟻
勿將老少分憂喜君不見韓昌黎張童子同是陸公門
下士昌黎文章如皦日童子聲名逐流水人生傳世有
如此區區科第何難耳

題鄭郎中所藏張師夔畫

師夔畫好不可誣筆法頗似崑山朱未論人品高與下
胸次自是吞江湖平林絕澗雲模糊深處自有哀猿呼
青苔細路絕人跡遇著即是漁樵徒忽然空翠落衣袖
崇山峻嶺相縈紆丹梯百尺通玄都仙家茫茫還有無
臥游三日猶不足王維輞川無此圖題詩却問鄭大夫
此圖應著千金沽

賦黃樓送李貞伯

維河有源星宿同導河積石思神功濁流汗漫失故道
積石却與澶淵通平郊脫轡萬馬逸一夜徑度徐州洪
徐州太守蘇長公夜呼禁卒登城墉一身未足捍大患

豈無木柵兼竹籠戲馬臺旁二十里有隄橫亘長如虹
高城不浸三版耳挽回魚鱉仍耆童防河錄成天有工
黃樓高起城之東五行有土可制水底用四壁塗青紅
太守登樓賓客從舉杯酌水臨長風河伯稽首受約束
不敢更與城爭雄水流滔滔向東去紆徐演漾殊從容
負薪投璧竟何用漢家浪築宣房宮自公去後五百載
水流有盡恩無窮我生慕公公不逢安得置我茲樓中
穎濱淮海獨何幸留得兩賦摩蒼穹鳳池舍人今李邕
南行別我何忽忽登高眺遠必能賦封題須附冥飛鴻

送王合州

南出都門去逢人問合州一官為別駕萬里付扁舟巫

峽流泉曉峨嶠半月秋緣知蜀道易隨處有詩留

登故友史西邨小雅堂

路繞黃家溪水長春風灑淚復登堂艸荒求仲常來徑
塵滿元龍舊臥牀分手死生嗟契闊傷心聚散覺淒涼
高丘數尺棲神地碧樹爭凋不待霜

分韻送貞伯

忽對春風南陌還思夜雨西窗高丘恨不千尺望見離
人渡江

題畫

水長鵝肫蕩口花飛鶯脰湖邊吳歌唱徹歸去日暮青
山滿船

除夜

夜深燈火四無鄰
強醉金陵麴米春
却憶去年何處宿
三义河口更愁人

楊一清 二十一首

一清字應寧雲南安寧州人成化壬辰進士授
中書舍人陞山西提學僉事遷陝西副使召為
太常卿拜左副都御史巡撫陝西歷戶部尚書
入直內閣進少師兼太子太師吏部尚書華蓋
殿大學士卒贈太保謚文襄有石淙橐

李獻吉云先生詩矜

持嚴整後拔典則七言律為最工雖唐
宋調雜瑜瑕靡掩然所謂千慮一失也
詩話遠卷古詩原本韓蘇近體一以陳簡齋陸放翁為師獻吉送昌穀
詩云吾師頗起揚與李力挽元化迴千鈞初意揚非李敵不過為師同

耳及觀石淙集實有高出李者乃知
文士以千秋自命類不輕許人也

舟中感興

宋朝西事興廷議仗數公三策戰守和持論各不同韓
公初主戰提旅當賊鋒至今好水川流血餘腥風范公
圖經略志守不志攻雕陰扼其吭靈武城其雄大順屹
有築清澗引而通雖無賊俘獻已過賊馬衝終教賊膝
屈西顧聊從容臣本鉛槧儒豈不念除兇功成枯萬骨
生意隨秋蓬而况兵家事勝敗誰能窮設險有明訓著
之易象中沙場四百里深塹連高墉一勞還永佚誓以
輸愚忠云胡曉曉者計不究初終作詩俟君子庶幾希
後功

聞人道漢中事

相逢漢中人爲問漢中事政殘令復弛此階誰作厲有
兵不識鬪有地無遺利紛紛敗攘徒來自川西地初焉
甚微眇可以折筮治玩寇者爲誰彌文巧蒙蔽星星不
時撲漸成燎原勢重煩宵旰憂撫捕勤大吏彼氓亦何
知從亂豈其意分明盜兵革潢池作兒戲胡忘渤海言
而味朝歌智居然恣屠戮爲此首功計番兵及曠徒剽
掠失防制如以賊禦賊進退誰適避寧偷從賊生懼作
迎降斃遂令漢沔間羣盜益昌熾村落莽成墟堊煙浩
無際師久力漸屈饋餉遠難繼壯士飢而逃道途目相
視關津不敢詰將領莫能致仲秋交兵辰諸軍自同異
貌貅頗創傷狐鼠未懲艾如聞制府來轅門稍生氣夾
攻本良策萬全亦非易成功在此舉莫使再顛躓人言
川賊興正坐科徵敝民窮盜斯起思之無乃是反本宜
急圖窮誅竟何濟邇來天監昭大奸伏噍鑽湯網解而
疎武戈藏不試寄語賣劍人太平今立至

山中吟

兩旬天氣看復陰黑雲故故團春岑耳邊時聽潭龍吟
深山大谷不可宿前途風雨愁人心

未至府谷得山西胡憲副源梁詩先是予與源梁
約保德府谷爲渡河之會源梁先至以詩來速和
韻答之

榆林東來神木道我心擾擾風中燾病軀不任馳驟勞
况是長途阻霖淖眼前車馬恨躑躅夢裏衣裳或顛倒
當秋一雨近歲無破屋家家蛙產竈至今溽潤滿庭戶
蟻蛭縱橫聚難掃人可勝天理則然古有堯湯非羿皋
吾皇憂民過往聖德旨蠲租憫無告邇來天澤闕不流
赤地茫茫方苦燥頓使呻吟化歌舞果然大命由人造
知君命駕千里來神交豈是私相好一官同擁繡豸服
矢心不媿皇天燾翻愁左顧勤撝訶賴有先憂繫懷抱
晉陽一別六七載如瞽偃偃藉誰導龍門尚隔衣帶川
意逐書郵已先到陽春下里本非類木李瓊琚浪酬報
吁嗟伐木久不聞友道蒼茫竟彫耗人間此會苦難得
肯似山陰空返棹與君興在希聲前不待冰絃已成操
元龍大床吾欲臥可聽登堂窺寢奧

送安成張都憲督運還鎮

文皇北狩開洪基古之燕薊今邦畿官河舳艫挽飛粟
歲四百萬供京師直從三湖到瀛海四十餘閘中逶迤
雖云恭襄擅勞績廟算天假非人為漕規百年漸成敝
民財已盡兵兼疲豪門貸券不知數公廩未入私逋追
姦人復此恣漁獵罔念膏血成塗泥君王聞之重悽惻
曰此瘡痍當底綏詔求經濟起頽廢公名首應朝堂推
都臺舊豸許重著先聲忽滿清淮潛塞帷問俗布新政
風霜雨露無偏私人言更化先將領疏屏庸瑣將無遺

明揚才俊給任使數月威令如飈馳高山虎豹莫敢狎
精采一變非前時疲氓敝卒總生氣昔者戚戚今嬉嬉
朝廷綱紀藉臺憲頗恨吾人翻壞之姑息之風滿天下
漢家三尺空然持剛者矯枉不達變志固可取終何裨
不然淫刑肆屠刈忍寡人婦孤人兒公柔不如剛不吐
寬嚴兩酌還平施淵魚苛察豈公事權度在我誰能欺
漕司政務亦填委老匠坐授羣工治如身使臂臂使指
大綱一舉萬目隨安得皆公撫諸鎮頓使赤子回春熙
嗟予關中舊分憲蒞公節下叨公知迂疎未敢辱同調
頗覺氣類元相宜公今入覲天顏喜縉紳動色瞻風儀
太常閒曹無報稱却望賢勞增忸怩秋風冠蓋送歸鎮

把酒欲賦難爲辭似聞臺省虛公位尚爲淮人歌去思

画鴈

江岸蘆花秋簌簌江頭旅鴈群相逐啄者自啄宿者宿
昨夜南樓聞北風天長水闊雲濛濛何當舟一葉擢入
蘆花叢

甘涼道中書事感懷 二首

望望日以遠行行春又闌蒼茫青海月咫尺玉門關北
闕星辰上南州夢寐間青山隨處有一見一開顏
弧矢威天下雷霆震域中大兵方出塞小醜自相攻繼
絕君王義宣威將帥功從今宵盱慮不復在西戎

聽雪

庭樹蕭蕭夢屢驚幾回風景逼人清坐吟食葉春蠶句
起聽空山裂帛聲寒落瓦溝停更響爽疑天籟靜還生
憑誰爲續幽蘭調萬古悠悠此夜情

孤山堡

簇簇青山隱戍樓暫時登眺使人愁西風畫角孤城曉
落日晴沙萬里秋甲士解鞍休戰馬農兒持券買耕牛
回思未築邊牆日曾得清平似此不

出連雲棧

雞頭關下石杈牙傍險憑高此駐車一水縈紆通漢沔
萬峰廻合控褒斜雲中板閣燒難絕谷口篔簹翠欲遮
蜀道秦關俱莫論於今四海正爲家

山丹題壁

關山偏仄人踪少風雨蒼茫野色昏萬里一身方獨往
百年多事共誰論東風四月初生艸落日孤城蚤閉門
記取漢兵追寇地沙場猶有未招魂

還至莊浪

平沙落日路漫漫千里風光一色看剛道雨來翻見雪
偶然熱後忽生寒城非據險兵猶少地屢經荒食更難
稍喜沿邊諸將吏肯甘清苦慰彫殘

聞河套有警

百二秦關故可憑延寧千里險堪乘濁河下遶還成套
曠騎冬來慣蹋冰塞上煙塵嗟未息曾中兵甲媿無能

粟芻山積君休羨民力年來已不勝

出郊

向來塵慮已真拋一臥經年始出郊天下華陽稱八洞
人間福地是三茅病求仙未聊充餌老愛雲松願結巢
夢覺迷途自茲始北山猿鶴謾相嘲

將至寧夏

奉詔西征駐節時元戎奏凱已先期苗民自逆三旬命
猷猷何勞六月師燈火家家開夜戶弓刀隊隊卷風旗
益兵加賦休重道財力於今兩不支

邊汝成侍郎話舊

病裏詩成手自書重逢又是十年餘已看精力消將盡
何止聰明較不如西去幾回勞遠夢南來聊得慰閒居
故人不道吾衰甚猶有微言為起予

竹西書屋

萬竹參差路不分州堂風景隔塵氛他年有約東鄰卜
半為先生半此君

和西涯漫興

園亭風日入清秋綠樹重陰護四周頗恨青山看不見
似應別起看山樓

遊茅山

丹梯百丈許攀緣萬古華陽此洞天不獨山人能愛客
野花啼鳥亦欣然

題画送謝岐歸閩

有足不躅風塵車有手不艸封禪書茫茫天地誰知已
還指梅花是故廬

文林 三首

林字宗儒長洲人成化壬辰進士除永嘉知縣
改博平陞南京太僕寺丞遷知温州府有文温
州集

永嘉縣齋寫懷

墨綬垂青絲銅符寵郎秩駕言謝朝行出領滄海邑脈
脈辭親知依依去鄉國溯行僅千里已在東南僻地遠
煩刑誅年貧正艱食自顧書生愚疇堪付休戚流移已
懷慚征歛况余職平生跌宕懷雅志山水適及此東嘉
遊清真信靈域豈無康樂情坐有民社責斂板事承迎
鉤稽困文籍拂意不能歸自媿陶彭澤

靜海驛

深夜驛途靜長河瀚海通舟明沉水月燈暗落潮風暝
色浮煙外春光欲雨中年年苦行役踪跡任飄蓬

舟中有懷林待用

渺渺長波映遠空依依新柳颺春風相思人在青山外
盡日舟行細雨中汲黯身為漢廷重杜陵詩到錦城工
天王明聖江湖遠羸得驅馳兩鬢蓬

周軫 一首

軫字公載莆田人成化壬辰進士歷官江西按察使有章林藏橐

和竹溪見贈歸來亭

小亭岑寂四窗開坐看春風長綠苔為愛多情雙燕子
暫時飛去又飛來

黃 榮 一首

榮字儼仁莆田人成化壬辰進士官按察僉事
有柳南集

牧牛圖

江艸青青江水流臥吹孤笛弄清秋放牛莫放南山下
昨日南山虎食牛

楊 榮 二首

榮字時秀餘姚人成化壬辰進士官工部都水

主事

黃太冲云都水工於詩會試舟中取唐音和之月餘成秩一時風尚和唐音而都水能得其風致徐子元詩談與慈溪張式之

品同

江西旅懷

客夢家千里鄉心柳萬條片雲遮海嶠一雨送江潮戀
關緜袍在懷人尺素遙春光看又晚何處灞陵橋

子規

江天夏夜露氣清山鳥忽作斷腸聲莫道啼多不解意
催人歸去最分明

明詩綜卷二十四

明詩綜卷二十四

明詩綜卷二十五

小長蘆 朱彝尊 錄

吳郡 陸 稹 緝評

謝 遷 一首

遷字于喬餘姚人成化乙未賜進士第一累官

少傅兼太子太傅戶部尚書謹身殿大學士贈

太傅諡文正有歸田豪 李時遠云木齋歸田後專事吟詠有冲澹閒雅之趣山莊一首真得

陶家 情景

早過山莊避暑次陶公韻

侵晨理孤櫂山居將避喧好風忽南來吹我烏帽偏宿
鷺未移渚落月猶在山候門兩穉子問我何時還高山

與流水此意向誰言

王 鏊 四首

鏊字濟之吳縣人成化乙未賜進士第三授翰林編修歷侍講諭德進學士擢吏部侍郎累官少傅戶部尚書武英殿大學士卒贈太傅謚文

恪有震澤橐

鄧國賢云濟之詩蕭散清逸有王岑風致 錢受之云先生詩不專法唐於北宋似梅聖俞於南宋

似范致能峭直疎放先

正格律之外自成一家

靜志居詩話濟之以經義重詩非所長集中十二絕句甚得諷諫之體今錄其三諸公南巡詩雖多皆當遜席

己巳九月舟次相城

幾年約茲游為訪石田叟石田今已亡不使此言負相知三四人挈舟過湖口行行抵相城自卯將及酉四顧何茫然天水合為藪茅屋數家存荒蒲與衰柳本來魚鼈宮自合鷗鷺守始田者為誰餒也非自取有司事誅求亡者十八九念此為徬徨獨立延竚久作詩當風謠以告民父母

絕句 三首

少年天子重邊功烏帽戎衣手角弓行徧漁陽來上谷並無曠騎到雲中
安化跳梁即日平中原羣盜敢縱橫洪都定亂誰堪使除是君王自將兵
燕雲漠漠鎖重樓八駿驅馳正未休莫道十旬猶不返金陵原是帝王州

馬中錫 三首

中錫字天祿故城人成化乙未進士拜刑科給事中再疏言事受杖出為雲南按察僉事改陝西入為大理少卿以右副都御史巡撫宣府正德初起撫遼東召為兵部侍郎劾罷劉瑾黨之冒邊功者瑾矯詔改南京工部尋褫職瑾誅起撫大同召為右都御史督軍務討流賊陞左都御史掌院事以師老玩寇徵下獄踰年卒有東虛窗缺月照人寒殘雪留簷凍不乾衰信已憑雙鬢寄

田集

錢受之云東田七歲能賦詩評者謂其體格早類許渾晚入劉長卿陸龜蒙之間

西掖晚歸有感時事聊賦述短章用呈同志者

世緣聊作一枰看斜封官好空批敕神武門高未挂冠
誤却登山與臨水十年騎馬走長安

晚渡咸陽

野色蒼茫接渭川白鷗飛盡水連天僧歸紅葉林間寺
人喚斜陽渡口船表裏山河猶往日變遷朝市已多年
漁翁看破興亡事獨坐秋風釣石邊

謁元世祖廟

世祖祠堂帶夕曛碧苔年久暗碑文薊門此日瞻遺像
起輦何人識故墳棹楔半存蒙古字陰廊尚繪伯顏軍
可憐老樹無花發白晝鴉鳴到夜分

曹潔躬云用事典實鑄辭悽惋可稱絕唱起輦見元

史志

吳洪一首

洪字禹疇吳江人成化乙未進士累官南京刑部尚書贈太子少保

詩話少保弘治中官太僕卿與禮部尚書長洲吳原博禮部侍郎嘗熟李世賢都御史長洲陳玉汝吏部侍郎吳縣王濟之詩酒唱和立五同會五同者同時也同鄉也同朝也而又同志也同道也因以為名亦曰同會者五人爾少保因屬越人丁綵繪作圖五家各藏其一於是原博序之濟之題詩其後所云鄉邦自昔誰同會人事從來苦不齊是已今諸家所藏或亡于兵或燬于火予從同官徐電發所獲見一卷蓋少保家藏物也

客中和史明古

一尊誰共合朋簪又見空階覆綠陰草色不銷游子恨月光偏照故人心霜前白鴈音書在雨外青山別路深安得攜琴溪上去社中重覓舊知音

秦瓛一首

瓛字廷贄崑山人成化乙未進士官至貴州按察副使

閒居

絃桐不終曲坐起囊我琴非憚摩拊勞所嗟無賞音中心潛鬱陶曳杖循空林松風有古意石泉清俗心愛此憺忘歸前山生夕陰

王弼一首

弼字存敬黃巖人成化乙未進士除溧水知縣入為刑部主事出知興化府有南郭集

錢受之云存敬早有詩名為郎時與楊君謙結社才思豪逸後師山谷故多拗句造思甚苦與初詩骨格稍不同

舶上謠

連艘飛過石頭城獵獵黃旗發鼓聲中使面前傳令急
江南十月進香橙

彭網三首

網字性仁清江人成化乙未進士雲南提學副
使有雲田集

宿鄧川驛

風走落葉聲山犬吠不已披衣夜出戶明月照溪水李渭

清云誦之冷然

姚安分司

吟人夜未眠迢迢漏初永起步山月中疎枝露後影李渭

清云詠後不以聲而以影瀾見體物之工妙

詠刺桐花

樹頭樹底花楚楚風吹密葉翠翩翩露出幾隻紅鸚鵡

楊用修云刺桐花雲南名為鸚哥花形酷似之彭公此詩本四句命吏寫刻於扁遺其一句復誦之自覺意足乃不更改其詞風韻可愛

洪貫二首

貫字唯卿鄞縣人成化丁酉舉人鄧州教諭遷

從化知縣改政和有太白山人豪李杲堂云先生詩法盛唐嘗擬杜陵

秋興八首傳至京師李文正大加賞歎晚結廬東皋自號稼翁年九十尚不忘摘翰每一詩成好事者輒傳寫焉

唐宮詞二首

花萼遙連務本樓五王文采盡風流不知凝碧池頭宴
落盡宮槐一樹秋

雙飛金鳳綠雲翹舞袖三千盡絳綃一自鑾輿西幸後
白頭如夢說前朝

梁

儲一首

儲字叔厚廣東順德人成化戊戌進士選庶吉
士授編修進侍講洗馬掌翰林院學士遷吏部
侍郎進尚書累官至少師兼太子太師華蓋殿
大學士卒贈太師謚文康有鬱洲遺藁

元夜應制

雲中珠翠壓鰲頭雉尾雙雙護冕旒聖主經年少巡幸
春來方覩屬車遊

伊

乘一首

乘字德載上元人成化戊戌進士歷官按察僉
事有集

遊虎丘

舟行山在眼到門山忽失去郭僅七里攀磴窮百尺巖
姿互明晦潭影杳深黑步倦松暫憩醉眠草堪席不逢
試劍人猶覩試劍石臺殿半空起雞犬下方隔經聲雜
梵唄禪定悟空寂晉唐歷劫多劉白不世出闡劇固殊
調登覽各有適重來預作期昨游宛然憶了性未有因
寓形何苦役依此愴忘歸於焉永終日

林

俊四首

俊字待用莆田人成化戊戌進士授刑部主事

歷員外下獄謫姚州判官復官南京刑部員外
擢雲南按察副使進按察使調湖廣轉廣東右
布政使以僉都御史巡撫江西改四川陞右都
御史工部尚書改刑部加太子太保謚貞肅有

見素西征集

楊應寧云見素詩宗子美晚乃出入黃山谷陳無
已問初視之若有隱澀語久而咀嚼悠然有餘味

馬 王元美云林待用如太湖
中頑石非不具微致無乃癡重

詩話中山狼小說乃東田馬中錫所作今載其集中世傳以訾獻古者
數其負德誦也攷之庶李未嘗隙未黃才伯有讀見素揅空同奉疏詩
云憐才不是雲莊老林殺中山猶
後狼然則當日所訾乃負見素耳

門扇峽

灤西一舍近兩山勢迴合巨石壯此門鐵衣護周匝楚
蜀錯犬牙乾坤互開闔當關一夫守萬馬不敢踏雲龕

嵌玲瓏元氣深吐納推篷見巫峰哀猿響相答

別鄉人

驛路迷燕浦官梅動越吟相看今日意同是故鄉心祖
道寒沙上傳橈綠柳陰滄洲有奇事未老忽抽簪

送方上舍

客路阻風沙離心逼歲華潮平今夜月梅作去年花囊
澀書還購天寒酒待賒席珍逢聖主未許卧煙霞

有題

山崦雲猶暮江天雨欲晴院深芳草合日落野舟橫古
路稀人跡青林但鳥聲春風期載酒相對面柴荆

陳章一首

章字一夔松江華亭人成化戊戌進士除刑部主事歷郎中降瑞州府同知遷高州知府移黃

州有西潭臺

錢受之云一夔作詩醞藉典則時有真詣秋懷詩云人老漸驚生白髮家貧未辦買青山楊君謙以

為自然妙句君謙移疾得請諸公攜酒錢別日暮雨作有七人聯句詩七人者自一夔外為古直老人黃巖王佐仁甫王弼存敬海寧徐寬粟夫華亭侯直公繩吳江趙寬粟夫皆君謙詩友而一夔存敬粟夫皆出吳原博之門時時過從東園酬和者也

詩話一夔自高州移黃州吳匏菴哀詞云一朝下恩旨稍幸得量移齊安佳山水足以為詩資如何始聞命已與人世辭蓋未至齊安而沒也又云平生無所好所好止於詩積成西潭臺千首尚多遺今其集竟不可得

即席贈趙栗夫

菜市街西新卜居豆棚瓜蔓共蕭疎
胃中富有書千卷誰信家無儋石儲

陳璠一首

璠字玉汝長洲人成化戊戌進士改庶吉士授戶科給事中歷南京都察院左副都御史有成

齋集

詩話成齋出西門之門當時雖不以詩名而恒與西涯方石鮑蕃諸公行席聯句知見賞於西涯者深矣

曉經分水

卧聞水禽聲推牕看分水低岸雜芰蒲
吳淞宛相似波澄綠漪漪流急清駛駛
荇舞翠帶長鷗翻白雪比垂楊遷嬌鶯柔莎露游鯉
分明一鏡開身在鏡光裏停梭緩緩行神爽情亦喜我苦思歸人鄉問將近矣

陳炷一首

炷字文用閩縣人成化戊戌進士有留餘臺

次毛叅將秋日江居

雲淨羣峰出江空一鳥遲
雨前蘿補屋霜後菊編籬
巢燕非新主沙鷗是故知
考槃人自取天地豈吾私

包鼎一首

鼎字汝調嘉興人成化戊戌進士除兵部主事
歷郎中出知池州府

己丑下第南還

孤舟千里賦南歸慚愧逢人問
禮闈野浦關情芳草遠
曲江回首杏花稀
半生事業雙蓬鬢
十載風塵一敝衣
臨水高歌向何處夕陽煙樹共依微

林榮一首

榮字仲仁合浦人成化戊戌進士歷官雲南按察副使

薊門聞笛

冒寒重到薊門遊
羌笛嗚嗚起戍樓
應有開元遺譜在
月中三弄小梁州

孫衍一首

衍字世延松江華亭人成化戊戌進士除知沔陽州遷南京刑部員外郎出為延平知府有雪岑集

寄沈宗遠

挂席曾逢江上舟
別來彈指又經秋
閒從何處爭碁局

醉共誰人較入聲酒籌金鯽魚池芳草合女蘿花樹小庭
幽客中無限相思意坐對寒燈獨自愁

黃 珣 一首

珣字廷璽餘姚人成化辛丑賜進士第二累官
南京吏部尚書贈太子少保謚文僖

應制勸農

四民皆天職嗟農獨苦辛所以古哲王巡省及茲辰簫
鼓吹豳頌訓迪良諄諄東郊土脈動好鳥鳴芳春桑園
拂其羽催耕一何頻乘時播嘉種原隰交昉昉念茲民
所天珠玉安足珍一日苟不作飢寒將立臻勿恤霑體
勞但憂年歲屯霑體勞尚可歲屯傷我民意昔先皇時

端居軫郊闡載歌憫農詠丕揚列祖仁禁苑藉千畝兩
暘雩百神玉食豈不足貴令四海均九重尚結念况爾
謀其身古人有良言歲計在于寅豈伊公家賦父子亦
以親春風正發育萬物皆鮮新勉矣東作力竚看西成
禮

趙 寬 一首

寬字栗夫吳江人成化辛丑進士除刑部主事
歷員外郎中出為浙江提學副使遷廣東按察
使有半江集

題画

細雨入林深孤雲映山薄何處是歸舟臨風倚江閣

張吉 二首

吉字克修餘干人成化辛丑進士除工部主事
坐上疏貶景東通判歷官貴州左布政使有古

城集

詩話古城窮理講學其詩罕傳觀其序晦菴感遇詩謂兼蘇李之體製陶孟之風調章柳之音節非漢晉以下詞人所及生平後者不根於此而有能詩聲我不敢知也其論詩亦非戶外語今錄李忠烈祠送迎神曲李東陽記云成化五年春正月長沙府知府事臣錢澍言臣所守潭州當元兵至時宋知州李芾畫地而守士卒皆殊死戰城且陷芾召帳下沈忠遺之金曰吾力竭當死吾家人不可辱於俘汝盡殺之而後殺我忠辭不獲命乃醉其家人徧刃之芾亦引頸受刃忠焚芾居還自殺其妻子復至火所自殺是時先芾死者知衡州尹穀死於火參議楊震死於池後芾死者幕僚陳億孫顏應焱潭民多舉家自盡城無虛井縊於林者相望其事昭晰在史傳布揚在天下浹洽在郡人耳目而郡之祀事不立其為闕典不細臣已立祠於芾所居故地以尹穀等配著諸祀典儀物使有司永有所遵式事下禮部具春秋祭芾用豕一羊一棗盛備餘各羊一制可其本末頗詳附注以便觀者

李忠烈公祠迎送神樂章 二首

紛犀甲兮翠旛亂湘流兮若雲春露兮秋霜無遠無近
兮援枹執鼓折芳馨兮代舞旅牲醴兮芬熏公入廟兮
有白其駒我維公駒兮在庭之隅公不醉飽兮我呻且
吁

脩蛇兮綦綦猘犬兮言言臨衝兮第第曠騎兮誦誦兵
血戰兮幾盡涕橫流兮霑巾彼蒼者天子胡不仁死為
趙氏鬼兮生為宋臣嗚呼我公兮人道之紀口不忍言
予心曷其已潔我肥腍兮稱我兕觥千秋萬歲兮祀事

孔明

盧格 一首

格字正夫東陽人成化辛丑進士除貴溪知縣擢江西道御史有荷亭集

詩話正夫難經伉儷朱子亦不心服其讀易詩云三聖若專尊卜筮宣尼何用絕韋編又云世儒問我五經原易道原居六書先苦說義文專卜筮街頭盲瞽盡真傳又詠詩云夫子刪詩立義精國風雅頌各分明考亭半作淫奔什何用為邦放鄭聲所撰荷亭辨論八卷同郡章楓山不以為非戴山劉念臺為作集序而曰後儒不及前人由其果於自信之意多而存疑者寡也幾於袒左矣

遣興

莫歎風塵行路難閒過僧舍借花看
數聲啼鳥不知處滿地綠陰清晝寒

葉元玉 一首

元玉字廷璽清流人成化辛丑進士有古崖集次龍門衛作

龍門關外龍門衛元是紛紛狡兔場今日草枯蕃馬瘦將軍穩卧綠沈槍

王 敬 三首

敬字漢英南京錦衣衛人成化辛丑進士歷官太子少保兵部尚書贈太子太保

渡大同江和董內翰

泃水元歸海山城半入江春潮翻石壁飛雨打船牕作賦才誰健凌雲氣未降濟川翰董相不日看經邦

詩話宮保與董文僖越同使朝鮮迭相唱和而諸詩蒼老頗勝董公

登浮碧樓

山閣凌空起孤雲挾雨飛好花臨驛路小艇占漁磯石

日言總卷三十五
磴斜通郭煙邨半掩扉主人留客意薄暮肯言歸

過箕子故城有感

柳暗荒城水滿渠幾家門巷帶邨墟井田已廢千年後
故壘曾經百戰餘果下更無三尺馬盤中時有八梢魚
遺封舊墓知何在試一停車問象胥

方一首

向字與義桐城人成化辛丑進士授南京戶科
給事中以言事謫多羅驛丞後官至瓊州知府
有素亭集

桃源道中

桃源西望是辰州兩境中分五置郵征旆影隨紅樹沒
斷橋水帶夕陽流關山迢遞孤臣路風物淒涼滿地秋
半世飄零竟何事獨騎瘦馬重回頭

侯一首

直字公繩松江華亭人成化辛丑進士歷官廣
西參議

夜集送楊君謙

馬蹄日日走紅塵自怪微官繫此身滄海煙波無限好
未歸真是不如人

鄭一首

瑗字仲璧莆田人成化辛丑進士官郎中有省
齋集

獨不見

東飛伯勞西飛燕我所思兮獨不見歲云暮矣多霜霰
日月推遷玄髮變策策處廓誰與鄰高山無蹊河無津
車粼粼馬駢駢車馬縱橫徧城闈獨不見意中人

邵寶 六首

寶字國賢無錫人成化甲辰進士知許州入官
戶部歷郎中出為副使以副都御史總漕江北
再起巡撫貴州陞戶部侍郎終南禮部尚書卒

謚文莊有容春堂前後集泉齋勿藥集

李賓之云國賢集該

括情事摹寫景物極所欲言而無冗字長語 上濟之云國賢古詩有魏晉之風師其意不師其辭興寄闡達體裁簡重 林待用云國賢根幹宋儒標致秦漢莊以潔和以平紆徐容與澁博而不肆 浦文玉云先生詩謹重精純得諸宋維神森嚴得諸唐爾推深厚得諸漢 鍾伯

敬云空同出天下無真詩真詩惟邵二泉耳 錢受之云文莊為戶部郎始受業西涯之門西涯以衣蓋期之西涯既沒李何之燄大張而公獨守其師法 確然而不變

詩話二泉詩如平原彌望雖盡剪其荆榛惜少芳華可采

三一亭詩為俞吏科作

瑕登西岡亭我懷樂共子有言感予衷千載猶仰止生
三事之一誰能不由此出為升堂由入為趨庭鯉廊廟
復江湖蒼生共憂喜俯仰天地間念念何時已所不盡
吾心有如此溪水

水北山莊圖歌

近來善學孟端画眼中吾許張臨湘臨湘病後作此幅
樹色慘澹山蒼蒼水北山人好事者要我題詩惠泉下

明詩歸卷三十五
十一
秋林逝矣不可招臨湘臨湘亦其亞菊有黃華夜榻深
長吟偶坐吾玉林樽前擊節興未已誰能和以無絃琴
聽松菴裏廬山壁少日相看眼雙碧酒酣且作山人歌
莫向山僧問疇昔

夜坐有懷浦文玉

哭子身仍病懷君我亦傷江湖秋欲老風雨夜初長鶴
夢蘼汀遠蛩聲草砌涼蒹葭空獨賦愁絕不成章

雞鳴山

鍾山西引一峰高雲磴盤紆步不勞画裏樓臺自鐘鼓
望中城市有林皋江流入海初奔放世路懷人更鬱陶
却倚崔嵬發長嘯松風何處起秋濤

孟城即事

孟城驛前吟夕陽高郵湖上好秋光紅分菡萏初經雨
綠滿蒹葭未受霜遠浦有波長浴鷺近隄無路尚垂楊
南來時見吳江櫂却倚船窗問故鄉

乞終養未許

乞歸未許奈親何帝里風光夢裏過三月春寒青草短
五湖天遠白雲多客囊衣在縫猶密驛騎書來字欲磨
聖主恩深臣分淺百年心事兩蹉跎

喬宇六首

宇宇希大山西樂平人成化甲辰進士授禮部
主事轉吏部歷員外郎中遷太常少卿光祿卿

陞戶部右侍郎遷左侍郎出為南京禮部尚書
改兵部尋拜吏部尚書加少保兼太子太保卒

謚壯簡有克蒙橐

王元美云喬希大如漢官
出臨遠郊亦自粗具威儀

詩話莊簡詩有雄繁當時與邊李實為唱和交顧華玉敘其紀行之
作謂正者準雅則奇者挾幽險是不特功存社稷亦風雅之領袖也

送甕山偶遇潘南屏

朝日散林薄鐘聲出翠微青山面湖立白鳥背人飛勝
地不常有幽期能久違會逢高士話相對欲忘歸

秋風亭下泛舟

荒亭寥落野雲空漢武雄才想像中簫鼓橫流

一作開画
應聲

鷓鴣帆檣飛影動晴虹山分秦晉羣峰斷水入河汾兩派
通少壯幾時還老大不堪一作回首歎秋風

登大同城樓

東南山勢遠皇都西北樓高眺望孤荒磧平沙連塞遠
片雲寒鴈入空無長城萬里卑秦築文德千年仰舜敷
今日北門誰鎖鑰受降城外盡輿圖

幕府山

說著看山興欲飛湖西雙逕踏霏微寧辭九日登高會
况是諸軍奏凱歸林外鐘聲開宿靄江頭帆影送斜暉
亦知歡會何終極霜露休教上客衣

懷張南園

六詔山川萬里餘秋來長恨賦離居鴈歸不過衡陽去
何處逢人好寄書

寄劉南坦司空

江上青山多白雲秋來離思日紛紛別來擬鼓中流櫂
采得芙蓉一贈君

蔡清一首

清字介夫晉江人成化甲辰進士歷官南京國

子監祭酒卒贈禮部侍郎萬曆中詔特祀于鄉

追謚文莊有虛齋文集

林見素云介夫詩文別出體格掖人心而繫名教卒澤於仁義道德

粹如也

別鄒汝愚謫雷州吏目

識君未三月別君遽萬里吾豈小丈夫淚落不能止范

甫云言簡意長

王雲鳳三首

雲鳳字應韶遼州和順人成化甲辰進士除禮

部主事劾太監李廣下獄降知州陞陝西提學

僉事歷副使按察使召為國子祭酒以右僉都

御史巡撫宣府有博趣齋橐

詩話虎谷與王恭襄喬莊簡齊名號河東三鳳頗留意吟詠

古意

中夜有所思所思君不知春風吹露草秋風吹霜枝所
以別離人悠悠負心期別離非所惜年華難再得只恐
君來時妾已無顏色顏色既已非君寧無歎息

送孟仲平陝西屯田僉事

璽書初下建章宮諸將邊隅已望風秦甲連營金窟北
漢屯分畝玉關東山薶凍雪侵雲白水落寒巖繞澗紅
聞道西羌今款塞莫留魏尚久雲中

送客

春濕蒸雲雨散絲飄飄游子別離時愁看陌上青青草
送盡行人總不知

儲

七首

嚨字靜夫泰州人成化甲辰進士授南京吏部
主事歷郎中改北司考功陞太僕寺少卿進本
寺卿轉都察院右僉都御史歷戶部左右侍郎
改吏部卒謚文懿有駟野柴墟二集

顧華玉云公詩
冲澹沈鬱兼晉

唐之風

詩話文懿掉鞅詞場與楊君謙徐子仁杜樾居袷契君謙嘗題扇寄之
文懿愛惜絨題字未開視也一日子仁樾居過出扇作文懿因題詩
寄君謙云為惜絨題入手遲清風千里故人思画成一事知還欠封寄
江南乞寫詩亦藝林韻事也李獻吉牧倡和詩云承乏郎署所與倡
和則揚州儲靜夫趙叔鳴無錫錢世恩陳嘉定秦國聲太原喬希大宜
興杭氏兄弟柳州李貽教何子元慈谿楊名父餘姚王伯安濟南邊庭
實其後又有丹陽殷文濟蘇州都元敬徐昌穀信陽何仲默其在南都
則顧華玉朱升之其尤也當日倡和文懿實居其首及李何教行執政
欲加擯斥文懿以文章復古為國家元氣極其扶植得不傾陷風雅蔚
興斯人攸賴今之論詩者鮮及之論世者所當表微也文懿卒於南都
在正德癸酉後三年歸柩海陵攢於墓舍丁丑將葬啓視棺上生黝墨
成繪画文具画家皴染之法前則奇石枯松翳出二篠莖葉咸備左則
梅株天矯梢著數花右如左而樹枝差短其文深入木理四方來觀詫
為神異華玉為作靈徵記此事甚怪近靈壽傳去異撰有明異叢寶應
劉禹峰撰史外叢譚探幽
索隱獨此未載故附識之

席上賦史異仲歸雲洞

悠揚滿洞中歸來不知處曉起語農人春田夜多雨却

問洞中雲何時下山去

有懷

獨坐誰為伴清謠夜不眠懷人千里共看月幾回圓秦
塞連雲戍荆門下峽船歸程那可料依舊析津年

春晦贈別

二首

殘春餘幾日欲去且相留脈脈難為別恩恩不自由天
涯芳草路花外夕陽樓誰道文園客新來賦倦遊
病較芳時晚春含晦日陰曉鐘人不寐舊雨客難尋院
濕蛛絲重庭虛鳥跡深平明有幽事移竹滿西林

大房金源諸陵

奉先西下亂山侵澗道迴旋入暮林羊虎半存行殿跡

莓苔盡蝕古碑陰秋山春水風流遠大定明昌德澤深
却是宣和解亡國穹廬黃屋豈初心

望岐溝

野水荒煙沒斷橋欲尋遺老問前朝不因書記班師奏
未必岐溝定屬遼

老米店有感

層冰一夕塞河船記得攜家已十年鮭菜燈前誰共飯
月明行店一悽然

楊循吉

一首

循吉字君謙吳縣人成化甲辰進士除禮部主
事以病乞歸有松籌堂集

錢受之云君謙為詩多闡入盧仝任華諸家不屑屑規摹三唐

詩話君謙官儀曹人目為顛主事每稱病不出長官厭之人或勸之歸賦詩云鄙人自從三月來腹心久已病廢晨興至午尚不食夜枕呻吟睡尤寡有人謂我病如此何不袖身向林野一聞此言即再拜誰有愛人如此者久知山水淡有味漸覺功名輕可舍乘今秋事天漸涼定買扁舟向南下遂疏詩致仕沈啓南聞其歸賦詩云都門祖帳百花飛多見龍鍾賦式微較取柳條千萬折不曾送一少年歸是時君謙年僅三十有一也其後康陵南巡為伶人臧賢所薦冠武人冠見帝應制賦打虎曲稱旨恒在御前填詞與俳優雜處乃謀於賢請急放歸其論詩曰詩不當以格律體裁為論惟求直吐胸懷實欽景象婦人小子皆曉所謂然後定為好詩其他餽饋攢簇拘拘拾古人涕唾者亦木偶之假綫索以舉動者吾無取焉故其詩多俚近然如陽山火石一篇賦情傲兀用韻妥帖非讀破萬卷書不能作也君謙好蓄書孜孜不及題書廡詩云吾家本市人南濠居百年自我始為士家無一簡編辛勤一十載購求心頗專小者雖未備大者亦略全經史及子集一一義貫穿當怒讀則喜當病讀則痊恃此用為命縱橫堆滿前當時作書者非聖必大賢豈待開卷看撫弄亦欣然奈何家人愚心惟財貨先墜地不肯捨斷爛無與憐朋友有讀者悉當相奉捐勝付不肖子持去將鬻錢又鈔書詩云沈疾已在躬嗜書猶不廢每聞有奇籍多方必羅致手錄兼買人恒輟衣食費往來遠客行點畫勞指視成編亦艱難把玩自珍貴家人心我癖既宜安用是自知身有病不作長久計偏好固莫捐聊爾從吾意是時吳中藏書家多以秘冊相尚若朱泚甫吳原博聞秀卿都元敬輩皆手自鈔錄今尚有流傳者實君謙倡之也

詠陽山雲泉菴大石奉和諸公同游聯句之作

偉哉此陽山有石俟歌誦形將水塊截勢與蓮花共仰
 觀一何高登涉不可輕鳥飛必徊翔雲出自騰滄孤員
 外成嶠空朗中含洞瘦如辟穀良清若食蚓仲深思殆
 天設乍至令人恐濃蘿作垂陰寒泉滴為凍戴菴亦顛
 危攜觴更交綜耳脇或駢攢勤拳時獨送巍巍上少並
 森森下多從荒厓始誰開倒樹諒非種在茲三吳間當
 以九鼎重崇巖借冠冕卑巒聽提控勞呼援固匿被壓
 松堪訟曲躬始得門側身還入術拂苔劣容眠收乳兼
 資用志猶記秦餘材曷遺禹貢立久氣濕袍嘯高聲答
 甕論年越殷周言時晦唐宋一為佛者居永作游人奉

病宜謚著史寐稱搏養永四方傳不誣諸公評切中臨
谷足還酸乘巔目偏縱支頤詎厭看極口難竭諷鬼鑿
手須胼鯨負背應痛東岱徒小魯西華繆推雍懸磬風
發鳴香爐煙結供曝沙伏靈龜食岡停遠鳳是知隆拔
羣所貴秀合衆偷餘殿容穰就隙亭閣棟枯藤蔓穿竅
長蛇舌撩縫輕盈受指彈玲瓏脫泥壅芾拜本無忝羽
撼爭得動栽培稀尺閑構架靡寸空炎伏涼自生清秋
月堪弄林深必賴燭嵐酷能作鬪星光猶立芒龍吟殊
叶碯嶺獅馴已賓阜虎寧敢闕久嗟隔勝賞頻勞落清
夢即欲營終棲其奈懷微俸

鮑楠一首

楠字良用歙縣人成化甲辰進士官南京戶部
員外郎有龍山集

舟中

野渡溶溶春水夕陽點點寒鴉欵乃數聲何處行人一
擢天涯

祝萃一首

萃字維貞海寧人成化甲辰進士歷官陝西提
學副使有虛齋遺集

紀行

訪舊指樵李擢出武原谿亭午歷璵城燠焉如春熙舟
人共裸裎愛此南風吹老夫厄蓬櫂默坐心獨疑雲雨

易翻覆變態不可知戒言避中流沿涯沂清漪屏翳忽
四合飛廉驟如馳艦首屢低昂怒波揚其威所幸誕登
岸危致檣檝摧顧彼鄰舟人哀哉沈鷗夷古云行路難
此語良不非相望不百里尚爾逢顛危而况千里程能
保無嶮巇裁詩紀所遭進退宜知幾

費宏一首

宏字子充鉛山人成化丁未賜進士第一累官
少師兼太子太師吏部尚書華蓋殿大學士贈
太保謚文憲有鷺湖摘橐

有感次韻

妖孽纔消一戰收猶煩禁旅扈宸遊皇人縱有瑤池樂

野老翻深杞國憂極北五雲瞻帝座淮南千里候龍舟
秋風忽漫悲搖落鴻鴈嗻嗻在荻洲

詩話文憲在康陵時以守正拒寧庶人此
詩因南昌已平而康陵猶南征而作也

石珪八首

珪字邦彥藁城人成化丁未進士改庶吉士授
簡討歷修撰侍讀學士遷國子祭酒陞南京吏
部侍郎改禮部尋掌翰林院陞禮部尚書轉吏
部入直文淵閣進武英殿大學士加少保兼太
子太保卒贈太保謚文隱更謚文介有恒陽集

李賓之云邦彥詩詞皆中矩度而七言古詩尤超脫凡近眾所不及
王元美云石少保如披沙揀金時時見寶錢受之云少保恒陽集曲
周令皇甫刪定為四卷詩僅一百九十餘首其言曰蓋欲美愛則傳
是以所存無幾君子善之其詩淹雅清峭諷喻婉約有辭人之風焉

詩話少保爰立在永陵初年是時諸臣以議禮忤旨帝初欲援以自助而鯁直自守至三封內批帝心弗善也故雖位列中台其詩多蹇產而不釋如云龜勉二十年十事九失意又云人生值命薄所遇多不平又云雖云日偃仰亦復成局促又云趾發物已逝意行悔相連又云軒冕豈不華一喜生衆惕又云幡幡鳴春鳥解使朝變昏又云古來忠與邪往往激褊淺又云苟移造化柄黃土亦易崇又云寧為白壁碎不作脂與韋寧為鈍劍折不作鈎與錐又云事去朝露空安辨窮與達又云牋誥日紛綸君臣互相諛但聞都俞聲無復咈與吁又云終然千古下忽有知己歎蓋當日論難之間未盡和衷之雅一傳衆跡誰與為善乃知人生不得行曾懷雖作相與不遇等也近見東南文士有推少保詩為北方之冠者又或謂得長沙之指授俱未盡然其詩頗類明初西江一派

送邵國賢分韻

君帆已南下僕念日旋軫豈謂萍水分如失繩與準平生東朝歡肝膽屢得盡曠然趨大塗一笑破畦畛器鉅用不微多士宜汲引誰撞待問鐘虛往歸必稠吾聞凌霜幹乃自階下筍願培正直姿出身濟時閔

雜詩

皎月邈中天清光照無極秋毫森可數萬里經一拭寧知黑水潭其下深莫測龍蛇方蚴蟉行者為惻惻

春日雜言

長空多浮雲微雨露四郊美人隔蘭渚雜佩不可要去年梁間燕今歲將尋巢時物各芬芳吾興亦飄飄

秋蓮曲

西塘菡萏初破紅小舟蕩漾東南風羅裙曳水蘸輕碧驚起沙頭雙落鴻昨日采蓮蓮尚好今朝采蓮蓮已老綠房結子空垂垂翠黛朱顏可長保江頭日暮生嫩寒鴛鴦雙飛不過灘回頭女伴各無語淚灑銅仙承露盤

芟田行

芟田復芟田短刀長柄颼颼然開鎌先芟三百東村後
村前轟陸續南風吹場場土乾烏犍載車角穀鯨去年
種麥麥不成今年麥熟家無贏為語農夫合勤儉汲水
聊舂麥仁飯

春渡滹沱

世路無閒日風波歲歲新東風沙上鴈落日岸頭人去
國曾千里還家又一春林花應笑客夏病往來頻

六言

密雲欲雨不雨繁杏將開未開日暮小樓凝望江南燕
子歸來

會昌宮詞

羽節貂裘謁內庭太和公主髮初星御前細說和番事
六院都來隋淚聽

蔣冕一首

冕字敬之全州人成化丁未進士累官少傅兼
太子太傅戶部尚書謹身殿大學士贈少師謚
文定有湘皋集

湘山寺

孤墻湧山腰鐘聲隔煙樹朝暮見雲飛不見雲歸處

毛紀一首

紀字維之掖縣人成化丁未進士選庶吉士授

簡討歷修撰侍讀左諭德陞學士遷戶部侍郎
拜禮部尚書入直內閣進少保兼太子太保吏
部尚書謹身殿大學士卒贈太保謚文簡有鰲
頭類橐

武宗皇帝挽歌

玉輦今何處宸遊事已空淚多湘水竹悲切鼎湖弓汗
簡千年後鈞天一夢中空餘舊戎帳金甲凜霜風

陸完一首

完字全卿長洲人成化丁未進士累官太子太
保吏部尚書坐納宸濠賄論死議平劉六等功
戍泉州籍其家有水村集

題夏禹玉長江萬里圖

雲山蒼蒼江漠漠紹興年間夏珪作珍重須知應制難
卷尾書臣字端恪却憶當時和議成偏安即視如昇平
惟開緝熙較畫史兩河淪棄無人爭斯圖似寫南朝土
還有樓臺在煙雨釣叟蓁翁不可呼漁舟野店誰能數
但覺層層境不同林泉到處生清風意遠筆精工莫比
只許馬遠齊稱雄中原殷富百不寫良工豈是無心者
恐將長物觸君懷恰宜剩水殘山也畫終思效一得愚
更把飛鴻添在圖願君且向飛鴻問五國城頭信有無

王鴻儒二首

鴻儒字懋學南陽人成化丁未進士由戶部主

事歷官吏部侍郎南京戶部尚書卒謚文莊

擬楊鐵崖小游仙詞 二首

方壺員嶠月初生海色如銀萬頃明一片彩雲當面墮
東華童子召飛瓊

一別良常歲月賒茅君相念寄瑤華五雲閣吏無人換
猶是當年蔡少霞

楊廉 六首

廉字方震豐城人成化丁未進士累官南京禮
部尚書贈太子少保謚文恪有月湖集

詩話月湖詩派本白沙定山其言曰近代之詩大抵只守唐人知獲不
敢違越一步惟陳公甫莊孔賜獨出新格子好公甫詩既選注之好孔
賜詩又選注之其論絕句云於宋得濂洛關閩之作於元得劉靜修於
國朝得陳公甫莊孔賜因類成一姓名曰風雅源流其師心若是然其

七言長篇頗具掛鼻之力五律
亦以樸勝不盡類陳莊二公

過牖簡莫水部

疎牖密牖連一帶南船北船此關隘往年水小謹啓閉
十日五日牖邊待今年濟水偶然溢雪浪崩騰復砰湃
下如落井上登天三老無功神是賴誰移兩山作一門
管束千流與萬派當初本為畜水設豈知水大亦為闕
世間未有無弊法十利未免兼一害人言月河且緩築
不然水勢無由殺征夫自是懷往塗見月望弦今已再
履霜又恐阻冰凍帝鄉尚在紅雲外噫嘻水大莫怨遲
還勝從前水小時

往年得常山徐生惠硯甚佳丁未會試為監場軍

士持去自後所得硯皆不及之偶然追憶成古風
一篇

常山硯多青紫色不徒發墨仍潤澤憶嘗過市親閱來
惡者堆塵美藏匿再三苦索始出之坐賈乃邀三倍息
徐生簡選持贈予獲之如獲琮與璧硯兮亦視為我用
口不能言似對臆南宮攜去戰文場螳垤蜂房專一席
風檐交卷出門去竟為守舍軍士得脣焦口燥呼不還
亟欲往追天已黑歸來旅邸不成眠反覆思維良可惜
當時妄意復得之焚香叩易揲著策得夬之革觀繇辭
莫夜之戎即斯賊欲將此事白有司姓名無處稽尺籍
三衢舊穴尚可尋巧匠斲山盈左側猶傳上品多更多

紫袍玉帶殊輝赫雖然此特一物耳吾輩何為置欣戚
但恨珍奇失所遇此意英雄或能識

折桂寺

境豈浮屠勝東南秀此峰澗流千丈瀑崖長萬年松少
室留蒼鹿番君見小龍布鞵從此製雲嶠寄遐蹤

哭鄒汝愚

海舶傳消息傷心遂不還死同鄒別駕窮過蔡西山絕
識何由得英風竟莫攀惟餘前日疏傳寫遍人間

直科口占

南科自分一枝安北轉惟添待漏寒吏事兩京終是少
諫官直恐是閒官

題曹憲副采蓴卷

三泖秋霖浸四圍水邊未覺露葵稀金盤玉箸長安客
幾箇西風為汝歸

吳儼一首

儼字克溫宜興人成化丁未進士改庶吉士除
編修歷官侍講學士終南京禮部尚書謚文肅

有集錢受之云文肅詩詞清麗可詠

齒落

我年六十一已落第三齒若更活數年所存知有幾譬
若建重門一扉常自啓外侮窺其間孰禦而能止又若
築長堰隙穴不容蟻今已決尋丈不竭安肯已或言死
與生其機不在此此雖釋吾憂終焉非至理憶我初落
時掩口含羞恥只今落已慣與不落相似作詩紀歲月
亦漫戲云爾

羅玘一首

玘字景鳴南城人成化丁未進士改庶吉士除
編修歷南太常少卿吏部右侍郎贈禮部尚書

謚文肅有圭峰集錢受之云景鳴少出西涯之門為詩文振奇則古必自己出在金陵每有撰述必樓

喬樹之巔霞思天想或閉坐一室客有竊窺者見其容色枯槁有死人
氣皆緩步以出常語都少卿吾為尊公作銘暈去四五度矣今所傳圭
峰臺大抵樹巔
死去之所得也

寓言送李希賢

山僧下山時僧送不出山但問下山僧此去何時還乳

水閒一孔白雲留半間祇恐僧還少僧還誰閉關

李堂一首

堂字時升鄞縣人成化丁未進士累官工部右侍郎總理河道有堇山集

堇山莊雜詠

紅葉亂紛紛秋光到小村莫憐蒲柳脆幸與菊松存
獫狁山果牛羊戀華門石牀涼不寐流水激籬根

夏鏃一首

鏃字德樹天台人成化丁未進士官南京大理寺評事有赤城集

廣陵

九曲池亭龍氣消誰家水調共蘭橈眼前亡國無多恨
江水東邊是六朝

蘇葵一首

葵字伯誠廣州順德人成化丁未進士改庶吉士授編修出為江西提學僉事改四川終福建右布政使有吹劔集

金陵寄故園諸子

霜冷天空一鴈飛鳳皇臺上幾霑衣一燈夜雨人無恙
萬里秋江夢獨歸醉客酒壚隨處好驚心人事異鄉非
明朝又發金陵道搔首長吟對落暉

周旋一首

旋字克敬慈谿人成化丁未進士以兵科給事中出參廣藩有西溪小橐

暮景

斜陽含霽景江上去人稀垂老猶為客經冬未授衣僧鐘和月起漁火隔煙微故國雲霄外多從夢裏歸

楊子器 五首

子器字名父慈谿人成化丁未進士知崑山高平嘗熟三縣擢吏部考功主事進驗封郎中出為湖廣參議歷河南左布政使有柳塘先生遺橐

詩話名父早朝詩多至三百首其終篇云除却早朝無一事更從何地效驅馳可想見承平景象矣掛節官詞若落盡燈花風定後移來樹影

月明初已判聖恩非我分不傳私語到人間詩可以怨不其然乎至於春花將及九分九天氣又新三月三則尋常百姓家皆可道之不類深言中

早朝 五首

東方曙色未分明玉陛千官接武行華蓋殿開鑾駕出部頭天樂一齊鳴
九重天上六龍飛御氣氤氳拂太微鳳閣西頭明月在清光還照侍臣衣
風定天街玉佩和露華滿地溼緋羅更番奏對銀臺罷聽得西班牙喚六科
仙漏迢迢隔絳霄兩行銀燭照趨朝鼓聲纔歇鐘聲動不放朝官過御橋

曉風吹動角端旗仗外祥光繞赤墀忽聽殿頭宣內閣
獨承密旨退朝遲

文 森一首

森字宗嚴長洲人成化丁未進士除知慶雲縣
擢浙江道御史建言廷杖回籍起南京太僕寺
少卿終巡撫江西右僉都御史

九日

三載重陽菊開時不在家何期今日酒忽對故園花野
曠雲連樹天寒鴈聚沙登臨無限意何處望京華

沈山子云語不在深白然蘊藉

鄒 智一首

智字汝愚合州人成化丁未進士改庶吉士坐
誣下獄免死謫廣東石城所吏目居四年得疾
暴卒有立齋遺集

詩話立齋以吉士建言請黜萬安劉吉尹直三小人而進用王恕王竑彭韶三君子泰陵初政不報既而萬尹被彈事去劉獨銜憾刺骨嗾其黨攻吉中書人湯御史與離連立齋及劉壽州李主事文祥董沔陽傑謂數人以詩酒相結納互相標榜詆毀朝政繫貽齋書云夜夢一人騎牛將墜齋手挽之不仆又見齋執五色石引牛就正道人騎牛者朱也以齋將有扶持社稷之力法司周內坐以妖言惑眾律罪當死賴王毅何文肅徐文靖諸公力持之得生而立齋遠謫化州千戶所吏目既踰嶺從陳文恭講學未幾天折惜夫其獄中詩云人到白頭終是盡事垂青史定誰真夢中不識身猶繫又逐東風入紫宸誦者傷之至辭朝詩云望見衣裳只此時放臣逐客讀之尤為悽斷

辭朝

雲韶聲靜拜彤墀轉覺心驚不自持罪大故應誅兩觀
網疎猶得竄三危盡披肝膽知何日望見衣裳只此時

但願太平無一事孤臣萬死更何悲

傅珪 一首

珪字邦瑞清苑人成化丁未進士累官禮部尚書兼翰林院學士贈太子太保謚文毅自北潭

集

大寧僧舍

村外重關護原頭怪石蹲水聲來樹杪花影上山根寺
占殘碑蝕僧貧破衲存俗塵銷不得何用訪柴門

周詔 一首

詔字希正長洲人成化庚子舉人由嘉祥儒學教諭遷興府伴讀陞紀善食長史俸肅皇帝繼

大統從入擢太常寺卿兼翰林院侍讀卒賜祭

葬贈禮部右侍郎有歸吳和陶達意等集

詩話太常從龍舊學特拜清卿王耕原詩云漢文潛邸會風雲今日誰收第一勲夜半忽傳天上詔虎符新拜宋將軍殆為公而發也或云指陸武惠公近是石文介作傳稱公因事納忠言多剴切使更延其年不知大禮之議作何折衷或未必為張桂等力持以致興獻立廟稱宗未可定

飲酒和陶

得時言或違人皆以為是失時言合道求全反致毀毀
譽何足憑窮達亦偶一作不徒爾前程殊渺茫且來醉羅綺

明詩綜卷二十五

